

四庫全書

經部

欽定四庫全書

周禮註疏刪翼卷二十

明 王志長 撰

司士掌羣臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數註損益謂用功過黜陟者縣鄙鄉遂之屬鄭司農云版名籍

王氏曰羣臣之版謂書其名於版也治其政令即損

益之數與辨其年歲貴賤之等是也損益謂黜陟也
有損有益則有登有下其數有多少也辨其年則以
知其齒之壯老辨其歲則以知其任之久近貴若大
夫以上賤若士以下邦國謂諸侯都謂大都小都家
家邑也縣鄙六遂也言六遂以見六鄉卿大夫士謂
正臣及諸侯之臣與蒞都邑者也庶子者卿大夫之
庶子未命者也其適子已命者則為士

以詔王治註告王所當進退

劉氏曰太宰歲終則令百官府各正其治受其會聽其政事而詔王廢置矣此又詔王治者太宰詔之於職事之終也司士詔之於論定之始也

以德詔爵以功詔祿以能詔事以久奠食註德謂賢者食稍食也賢者既爵乃祿之能者事成乃食之王制曰司馬辨論官材論進士之賢者以告於王而定其論論定然後官之任官然後爵之位定然後祿之

疏六德六行為賢六藝為能奠定也○浚儀王氏曰

漢志先王之制里有序而鄉有庠序以明教庠以行禮而觀化焉八歲入小學學六甲五方書計之事始知室家長幼之節十五入大學學先聖禮樂而知朝廷君臣之禮其有秀異者移鄉學於庠序庠序之異者移國學於少學諸侯歲貢少學之異者於天子學於太學命曰造士行同能偶則別之以射然後爵命焉○又曰典通鄉老鄉大夫舉賢能而賓其禮司徒教三物而興諸學司馬辨官材以定其論大宰詔廢

置而持其柄內史贊予奪而貳其中司士掌其版而
知其數擇材取士如此之詳也漢成帝建始四年初
置尚書有常侍曹主公卿事又有二千石曹掌郡國
二千石後漢改為吏曹主選舉祠祀尚書令總之後
又為選部魏改選部為吏部主選事○又曰裴子野
曰周禮始於學校論之州里告諸六事而後貢於王
庭其在漢家州郡積其功能然後為五府所辟五府
舉其掾屬而升於朝三公參其得失尚書奏之天子

一人之身所閱者衆一賢之集其課也詳故官得其才魏晉易是所失弘多萬品千羣俄折於一面庶僚百位專斷於一司吏曹按閱閱而選舉不違訪採於鄉邑○又曰王者各有所貴堯舜貴道德夏貴功商貴老周貴同姓秦貴法吏西漢貴才謀東漢貴經術魏貴文章晉貴名理周隋貴氏族觀其所貴知治體之優劣然最無謂者其氏族乎○陳氏曰古之六卿其分職也未嘗不通其聯事也未嘗不分司徒掌教

司馬掌政未嘗不分也有發兵則司徒教士以車甲
升造士則司馬辨論官材司馬之屬司士曰以德詔
爵此司馬辨論官材之謂也○東萊呂氏曰王制論
鄉秀士升於司徒曰選士司徒又論其士之秀者而
升之學曰俊士然後方免其徭役大樂正又論造士
之秀者升之司馬曰進士司馬辨論官材論其賢者
以告於王而定其論論定然後官之任官然後爵之
位定然後祿之一人之身未入仕前與既入仕後凡

經七級然後得祿漢唐以後大抵自重而漸輕自緩而漸速○雜說爵祿事皆稱詔獨其食不言詔者則知爵祿事皆有去取進退唯上之特命而奠食乃其常俸所當得之稍食故不言詔也言久者計其歲月之久所當食之俸若書稱德懋懋官功懋懋賞位事唯能得此理矣○雜說司士掌羣臣之版則官悉隸焉有德者始詔以爵有功者唯詔以祿有能者始詔以事後世但以官府煩多疑周官不知當時以事之

多寡而損益其員數觀卿士之賢能而為爵祿之與奪則官不至於冗蓋可知矣。○王氏曰凡公侯伯子男公卿大夫士皆所謂爵也。自下士視上農夫以至君十卿祿皆所謂祿也。事有大小能大者治大能小者治小故以能詔事食有多寡治大者其食多治小者其食寡事成於久然後食可定故以久奠食以德詔爵所以貴之以功詔祿所以富之以能詔事所以任之以久定食所以養之。

唯賜無常註賜多少由王不如祿食有常品

正朝儀之位辨其貴賤之等王南鄉三公北面東上孤
東面北上卿大夫西面北上王族故士虎士在路門之
右南面東上大僕大右大僕從者在路門之左南面西
上註此王日視朝事於路門外之位王族故士故為士
晚退留宿衛者未嘗仕雖同族不得在王宮大右司右
也大僕從者小臣祭僕御僕隸僕

臨川王氏曰所謂治朝也若朝士之位與此不同者

彼外朝之法聽獄弊訟詢衆庶之朝也鄉明以聽天下者王故王南鄉鄉王而答之者三公故三公北面孤佑王者也故東面卿大夫佐王者也故西面王族故士虎士大僕大右大僕從者則從王者也順王所鄉故南面三公東上則北面以東為右也自孤以上則皆以近尊為上公以下皆言面王獨言鄉不斥其體尊故也

司士擯註詔王出揖公卿大夫以下朝者

孤卿特揖大夫以其等旅揖士旁三揖王還揖門左揖
門右註特揖一一揖之旅衆也大夫爵同者衆揖之公
及孤卿大夫始入門右皆北面東上王揖之乃就位羣
士及故士大僕之屬發在其位羣士位東面王西南鄉
揖之三揖者士有上中下王揖之皆逡巡既復位鄭司
農云卿大夫士皆君之所揖禮春秋傳所謂三揖在下
疏士入應門即就西方東面位不待王揖大夫以上
皆待王揖乃就位也直言孤卿者亦舉輕以明重孤

卿尚特揖明三公亦特揖可知○又曰諸侯視朝大夫特士旅之諸侯臣少大夫與卿同特揖也○王氏曰孤卿尊故特揖之大夫卑於孤卿故中大夫下大夫各以其等而衆揖之士又卑於大夫故上士中士下士旁三揖焉王還揖門左揖門右則在門左右者皆南面故也○愚按尊君卑臣未有如今日者也聞聲之貴始於嬴秦至後代而遞甚焉夫君臣一體公卿其心膺大夫士其手足外心膺墮手足將以何者

成其為吾體乎豈弟君子遐不作人人人才之盛皆人
主志氣精神所吹噓而成者也是故能師臣則可師
者至矣能友臣則可友者至矣奴隸役之俳優畜之
則奴隸俳優至矣樹人猶樹木也鹵莽植枳棘於庭
欲收梗楠梓漆之用勢安可得乎至材不中繩矣不
歸而易種謀所以灌藝之術而惟橫加斧斤以快其
誅鋤尤無益於理亂之數也君驕臣諂世殊時異而
三代以後臣品因以日卑職是故耳誠得大有為之

主破鍤習而隆下交則帝王之佐當必有彈冠響應者不然自外其心脅自墮其手足以成孤危之勢君亦何利而為此也

大僕前註前正王視朝之位

王入內朝皆退註王入路門也王入路門內朝朝者皆退反其官府治處也王之外朝則朝士掌焉玉藻曰朝服以日視朝於內朝朝辨色始入君日出而視之退適路寢聽政使人視大夫大夫退然後適小寢謂諸侯

也王日視朝皮弁服其禮則同

王氏曰王視事於治朝既畢而入內朝則事官皆退也內朝在路門內亦謂之燕朝○陳氏禮書曰周官大僕掌燕朝之服位宰夫掌治朝之法司士掌朝儀之位朝士掌外朝之法文王世子公族朝於內朝庶子掌之其在外朝司士掌之玉藻朝服以日視於內朝退適路寢聽政然則文王世子與玉藻所謂朝者諸侯之朝也蓋天子庫門之外外朝也朝士掌之路

門之外治朝也宰夫司士掌之路寢燕朝大僕掌之
諸侯亦有路寢有外朝則文王世子所謂內朝者玉
藻所謂路寢也玉藻所謂內朝者文王世子所謂外
朝也玉藻於路寢之外言內朝則有外朝明矣諸侯
內朝司士掌之其官與天子同燕朝庶子掌之其官
與天子異魯語曰天子及諸侯合民事於外朝合神
事於內朝自卿以下合官職於外朝合家事於內朝
然則卿大夫亦二朝也○又曰玉藻曰朝辨色始入

君日出而視之退適路寢聽政使人視大夫大夫退
然後適小寢釋服朝辨色始入所以防微日出而視
之所以優尊詩曰夜嚮晨言觀其旂臣辨色始入之
時也又曰東方明矣朝既盈矣君日出而視之之時
也蓋尊者體盤早者體感體感者常先體盤者常後
故視學衆至然後天子至燕禮設賓筵然後設公席
則朝禮臣入然後君視之皆優尊之道也然朝以先
為勤以後為逸退以先為逸以後為勤朝而臣先於

君所以明分守退而君後於臣所以防怠荒此所以
使人視大夫大夫退然後適小寢釋服也然則公卿
諸侯之朝王其有先後乎詩云三事大夫莫肯夙夜
邦君諸侯莫肯朝夕夫夙先於朝夜後於夕則公卿
朝常先至夕常後退諸侯朝常後至夕常先退

掌國中之士治凡其戒令註國中城中

疏卿大夫士總號為士若詩云濟濟多士文王以寧
王氏曰士治治其進退損益也○或曰士治諸臣

之治蹟美惡

掌擯士者膳其摯註擯士告見初為士者於王也鄭司
農云膳其摯者王食其所執羔鴈之贄玄謂膳者入於
王之膳人

疏士亦是卿大夫士之總號謂初命為卿大夫士執
摯見王司士擯相之使得見也

及祭祀掌士之戒令詔相其灋事及賜爵呼昭穆而進
之註賜爵神惠及下也此所賜王之子姓兄弟祭統曰

凡賜爵昭為一穆為一昭與昭齒穆與穆齒凡羣有司皆以齒此之謂長幼有序

疏凡祭祀掌士之戒令者謂羣臣有事於祭祀皆掌其齋戒告令也詔相其法事者謂告語并擯相其行禮之事也及賜爵者謂祭未旅酬無算爵之時皆有酒爵賜及之皆以昭穆為序也云昭穆明非異姓是同姓可知

帥其屬而割牲羞俎豆註割牲制體也羞進也

疏制體者若據祭祀則禮運云腥其俎熟其殽體其
犬豕牛羊之類若據饗則左氏傳云王饗有體薦燕
有折俎是也

凡會同作士從賓客亦如之註作士從謂選可使從於
王者

疏此士亦謂卿大夫皆是也○劉氏曰選其行藝而
進之以從王也

作士適四方使為介註士使謂自以王命使也介大夫

之介也春秋傳曰天玉使石尚來歸朕

王氏曰使者奉王命而使也為介為之介者○王先
生曰上卿使則大夫為之介大夫使則士為之介

大喪作士掌事註事謂奠斂之屬

按士皆槩指羣臣此官所以名司士也

作六軍之士執披註作謂使之也披柩車行所以扶持
棺者有紐以結之謂之戴鄭司農云披者扶持棺險者
也天子旁十二諸侯旁八大夫六士四玄謂結披必當

棺束於束繫紐天子諸侯戴柩三束大夫士二束喪大記曰君纁披六大夫披四前纁後玄士二披用纁人君禮文欲其數多圍數兩旁言六耳其實旁三

凡士之有守者令哭無去守註官守不可空也

國有故則致士而頒其守註故非喪則兵災

凡邦國三歲則稽士任而進退其爵祿註任其所掌治王氏曰邦國之士皆命於王故曰凡邦國三歲則稽士任而進退其爵祿。雜說此正稽諸侯貢士之賢

否以行賞罰周禮諸侯貢士一項事別皆不見唯司
士此一役與合○尚書大傳諸侯三年一貢士一適
謂之好德再適謂之賢賢三適謂之有功賜以車服
弓矢再賜以秬鬯三賜以虎賁號曰命諸侯○王氏
曰按後漢左雄傳古者諸侯歲貢士進賢受上賞非
賢賤爵土升之司徒辨論其材此即所謂稽士任而
進退其爵祿也○明齋王氏曰諸侯歲貢士於天子
蓋自邦君之子與民間俊秀皆在其中賢者或留用

於朝或反其國司士於三歲則稽考諸侯所貢之賢
否以行賞罰記所謂進爵絀地也但記專以習射言
似於太拘此言稽士任則以其職任而觀之為得其
賢否之實也

諸子掌國子之倅掌其戒令與其教治辨其等正其位
註鄭司農云國子謂諸侯卿大夫士之子也燕義曰古
者周天子之官有庶子官與周官諸子職同文

疏諸庶通名俱訓為衆

玄謂四民之業而士者亦世焉國子者是公卿大夫士之副貳戒令致於太子之事教治修德學道也位朝位劉氏曰國子之倅謂副貳於其父之職業者也以其將世於仕進則必漸摩以忠義故設庶子之官○芸閣呂氏曰倅者貳也必用國子之倅者蓋古之為國其使君臣相信非一日積也天子君之貳也國子之倅諸侯諸臣之貳也以諸侯諸臣之貳事其君之貳學相同則好相合矣王制曰春秋教以禮樂冬夏教

以詩書王太子王子羣后之太子卿大夫元士之適
子皆造焉是也事相同則情相信矣國有大事則帥
國子而致於太子唯所用之是矣故太子雖未為君
也君臣之交際已盡賢不肖之知己悉可任使之才
已備則先王之慮後世者不為不預矣○王氏曰諸
子掌國子之倅而已蓋國子之適則為正而其庶之
介於適者則謂之倅○王介甫氏曰上文言國子之
倅而下言帥國子致於太子則諸子掌國子及其倅

非特倖也。○劉氏曰辨其等以其父之爵為之等叙其齒而為之位也。○鄭氏曰凡入學以齒

國有大事則帥國子而致於太子唯所用之若有兵甲之事則授之車甲合其卒伍置其有司以軍法治之司馬弗正註軍法百人為卒五人為伍

王氏曰置其有司則若伍之有公司馬卒之有長也國子屬太子司馬雖有軍事不賦之

凡國正弗及

疏上文弗正謂兵賦此云國正謂鄉遂之中所有甸
徒力征之等並不及也○王氏曰公卿大夫士則聽
於王者也其子則聽於太子者也休戚所以一體而
無異慮也○東萊呂氏曰古者太子與卿大夫之子
同其學或有大故則使太子帥其餘子在宮中天子
同其父御兵於外其子弟佐王之太子守宮於內此
見得內外相維持不拔之理如此夫太子素與諸侯
之子弟朝夕習熟故後來諸侯之子立為諸侯時事

太子為君此正是封建諸侯之本平日在學時必擇其能為諸侯者則他日立為諸侯有不可立者則不立也如國語宣王欲得國子之能訓諸侯者樊穆仲曰魯侯肅恭明神而敬事耆老賦事行刑必問於遺訓而咨於故實王乃命魯孝公於夷宮此是諸侯子弟同在學者又如楚世家曰當周成王時楚子熊繹與魯公伯禽衛康叔子牟晉侯燮齊太公子伋俱事成王此可以見太子素與諸侯子弟相處此其意可

以際見至春秋鄭太子忽在周亦有此意。李氏曰
大哉王者之師其備矣乎非直興於閭里而又取諸
世族彼以父祖富貴宜有報上之心況學習德行道
藝孰不知忠孝之美任之以金革則與夫干賞蹈利
庸徒鬻賣者蓋有間矣且太子將為君國子將為臣
君臣之分未定而恩義固已接則今日之遊倖未必
不為嗣王之將帥也文王世子曰公若有出疆之政
庶子以公族之無事者守於公宮正室守太廟諸父

守貴宮貴室諸子諸孫守下宮下室此諸侯禮也豈
天子之事而有不用力者乎○臨川王氏曰司馬弗
正凡國正弗及則是諸子正之太子用之而已○劉
氏曰大司馬總六鄉六遂都鄙之師無慮數十萬足
以制九州而御四夷而此國有大事則太子得以專
將其子弟司馬弗正國正弗及則國之根本不可得
而動搖矣聖人防微保邦之意深哉

大祭祀正六牲之體註正謂體載之

疏按特牲少牢移鼎入陳即有一人鼎中七出牲體
一人在鼎西北面載之於俎是也。○劉氏曰諸子學
禮樂詩書將世其父而未之用也。割牲體羞俎豆則
已仕者為之而司士掌之諸子則泣而觀之朝踐而
豚解必腥以獻也。醢尸而體解必蕤以獻也。至於犬
豕牛羊則升首薦血六牲之體必叙以獻。苟失其叙
有不中禮則諸子正而敘之。故曰正六牲之體習之
以其行也。

凡樂事正舞位授舞罷註位侑處也

某氏曰舞用國子故諸子為正其位授其罷也

大喪正羣子之服位會同賓客作羣子從

疏位謂在殯宮外內哭位也正其服者公卿大夫之子為王斬衰與父同故雜記大夫之子得行大夫禮故也作使也作羣子從使國子從王也○王氏曰國子亦謂羣子者又以居而衆者名之

凡國之政事國子存遊倅使之修德學道春合諸學秋

合諸射以攷其藝而進退之註遊倅倅之未仕者學太
學射射宮也王制曰春秋教以禮樂冬夏教以詩書王
太子王子羣后之太子卿大夫元士之適子國之俊選
皆造焉

疏大學在國中即夏后氏東序在王宮之左也射宮
即國之小學在西郊則虞庠是也王之子得適庶俱
在學若羣后畿內諸侯已下則庶子賤不得在學故
皆云適子也○學記大學始教皮弁祭菜示敬道也

宵雅肄三官其始也入學鼓篋孫其業也未卜禘不
視學游其志也時觀而不語存其心也幼者聽而弗
問學不躡等也此七者教之大倫也○王氏曰國子
之於政事若宿衛固守之屬也○王氏曰存者使之
在學而養之也○介甫王氏曰春合諸學則修德學
道也秋合諸射則以待兵甲之事也○明齋王氏曰
春合諸學學當作樂諸子一歲皆在學中豈獨春而
合之春合諸樂即月令季春大合樂也

司右掌羣右之政令註羣右戎右齊右道右

鄧氏曰凡御居車前之中便執策控御尊者居左勇士居右王有戎右齊右道右及五路倅車皆有右以捍外衛尊

凡軍旅會同合其車之卒伍而比其乘屬其右註合比屬謂次第相安習也車亦有卒伍

疏按宣十二年傳云其君之戎分為二廣廣有一卒卒偏之兩司馬法曰二十五乘為偏以百二十五乘

為伍○王介甫氏曰比其乘者比其乘之馬使齊力
屬其右者屬其右之人使同心○郝仲輿氏曰凡車
三三為小偏三五為偏五五為大偏是一師二千五
百人之車也二偏為卒又謂廣是合二師之車也五
偏為伍凡一百二十五乘是萬二千五百人之車也
此謂車之卒伍

凡國之勇力之士能用五兵者屬焉掌其政令註司馬
法曰弓矢圍及矛守戈戟助凡五兵長以衛短短以救

長

劉氏曰勇力之士屬焉者習之以五兵而選以為右也○王介甫氏曰先王既合萬民之卒伍以時習之皆使知戰矣又屬勇力之士能用五兵者於司右而使掌其政令則軍旅之事有選鋒以待敵齊民得免死焉無事之時武夫皆制於官府無所奮其私鬪矣○劉氏曰有文事者必有武備非特孔子也周公則然矣

虎賁氏掌先後王而趨以卒伍軍旅會同亦如之註王
出將虎賁士居前後雖羣行亦有局分

劉氏曰雖趨亦不離其卒伍示衆以嚴肅也○王氏
曰猶詩所謂予曰有先後也

舍則守王閑註舍王出所止宿處閑榿柅也

王在國則守王宮註為周衛也

國有大故則守王門大喪亦如之註非常之難要在門
及葬從遣車而哭註遣車王之魂魄所馮依

適四方使則從士大夫註虎士從使者

劉氏曰士大夫使於四方則以虎士從之護王命也若道路不通有徵事則奉書以使於四方註不通逢兵寇若泥水奉書徵師役也

疏若兵寇則徵師若泥水則徵役○王氏曰必勇猛有力者然後可以為使○王明齋氏曰書齊侯呂伋以二千戈虎賁百人迎子釗於南門之外蓋以勳戚顯諸侯入為虎賁氏之官虎賁百人即此虎士也率

之以迎立嗣君職隆任重如此故虎賁一宿列位太微垣而周公之戒成王拳拳於綴衣虎賁與常伯常任準人等重者豈非以其朝夕近侍至尊而非得正人不足養成君德歟

旅賁氏掌執戈盾夾王車而趨左八人右八人車止則持輪註夾王車者其下士也下士十有六人中下為之帥焉

王氏曰持輪以為安也

凡祭祀會同賓客則服而趨註會同賓客王亦齊服服
袞冕則此士之齊服服玄端

郝仲輿氏曰服而趨謂不介冑朝服夾車趨對下文
介為服

喪紀則哀葛執戈盾註葛葛經武士尚輕

疏臣為王貴賤皆斬哀斬哀麻經至葬乃服葛今王
始死即服葛故云武士尚輕

軍旅則介而趨註介被甲

王介甫氏曰王吉服則亦吉服王凶服則亦凶服王戎服則亦戎服○劉氏曰既衛王行則從王服吉凶介冑莫不如其所事○浚儀王氏曰帝王之居外則飭周衛內則重禁門將行則設兵而後出幄稱警而後踐墀張弧而後登輿清道而後奉引遮列而後轉轂靜室而後息駕所以顯至尊務形謹垂法戒也

節服氏掌祭祀朝覲袞冕六人維王之大常註服袞冕者從王服也維維之以縷王旌十二旒兩兩以縷綴連

旁三人持之禮天子旌曳地鄭司農云維持之

諸侯則四人其服亦如之郊祀裘冕二人執戈送逆尸
從車註裘冕者亦從尸服也裘大裘也凡尸服卒者之
上服從車從尸車

橫渠張氏曰天地山川之類非人鬼者不宜有尸節
服氏言郊祀有尸不害后稷配天而有尸也○郝仲
輿氏曰按是職本下士披天子衣執旗荷戈以趨於
禮何居祀天為尸亦不經○愚按後儒以節服氏掌

王服之中節者掌祭祀朝覲袞冕為句郊祀袞冕為句常與服相聯故掌維常之事袞冕以衣尸故又掌送逆尸二事乃節服兼職也然按書傳大輅圖王在輅上驂乘者一人步行導前者一人旁行者六人皆冕服則亦似有說今姑從鄭註

方相氏掌蒙熊皮黃金四目玄衣朱裳執戈揚盾帥百隸而時難以索室毆疫註蒙冒也冒熊皮者驚毆疫癘之鬼如今魁頭也

王氏曰蒙熊皮取其以毅而致果也黃金四目取其視無不見也黃中色金則剛而明剛中而明足以察見陰慝也執戈揚盾致其威也百隸罪隸夷隸之屬時難以時而難也月令於季春之難曰畢春氣仲秋之難曰達秋氣於季冬則命有司大難是也索室以室者陰慝之所藏也

大喪先匱註葬使之道

及墓入壙以戈擊四隅歐方良註方良罔兩也天子之

樽柏黃腸為裏而表以石焉國語曰木石之怪夔罔兩
疏按國語水之怪龍罔象土之怪夔罔兩○劉氏曰
歐罔兩以安王神也○王氏曰凡陰陽之氣初則為
利功成者退留則為災月令季春國門之儻曰畢春
氣恐寒氣留也仲秋天子之儻曰達秋氣恐暑氣伏
也季冬大儻辟一歲邪慝之氣此於太虛間不過氣
之宿留者而已留而中於物則為災為疫有鬼神焉
居聲氣之間以主之故儻以歐之使蕩而不留

大僕掌正王之服位出入王之大命註服王舉動所當
衣也位立處也出大命王之教也入大命羣臣所奏行
王氏曰正王之服則王之動容周旋無不中禮也正
王之位則王之出入起居罔有不欽也先正王之服
位而後出入王之大命則能正位然後能凝命故也
掌諸侯之復逆王眡朝則前正位而退入亦如之註前
正位而退道王王既立退居路門左待朝畢

疏大僕本位在路門之左進前正位訖還退居本位

故云退居路門左也入謂王退入路寢聽事○王先生曰有諸侯之復逆有孤卿之復逆有吏民之復逆皆所以通上下之情諸侯復逆掌之大僕諸臣復逆掌之小臣吏民復逆掌之御僕皆以位之尊卑而為之次第也若宰夫則有曰諸臣之復萬民之逆夫復者雖為諸臣言之而民亦未始不復逆雖為萬民言之而吏亦未始不逆是以御僕又云諸臣之逆庶民之復是知復逆通上下之辭也○雜說大僕掌傳達

章報而已亦屬於司馬何耶嘗觀秦將軍章邯使長
史欣請事咸陽留司馬門三日不得見邯遂降楚趙
充國六月戊申上奏七月甲寅璽書得報自極遠至
京師往還纔七日漢果以成功兵事貴速而忌壅蔽
有如太僕掌復逆司馬不能令之緩急能無虞乎○
王氏曰王眡朝眡治朝也○東萊呂氏曰如漢成帝
臨朝尊嚴若神及退朝與張放等所說皆淫僻邪侈
之事則侍御僕從之罔非吉士也先王厥旨深哉

建路鼓於大寢之門外而掌其政以待達窮者與遽令
聞鼓聲則速逆御僕與御庶子註大寢路寢也其門外
則內朝之中如今宮殿端門下矣鄭司農云窮謂窮寃
失職則來擊此鼓以達於王若今時上變事擊鼓矣遽
傳也若今時驛馬軍書當急聞者亦擊此鼓今聞此鼓
聲則速逆御僕與御庶子也太僕主令此二官使速逆
窮遽者玄謂窮達者謂司寇之屬朝士掌以肺石達窮
民聽其辭以告於王遽令郵驛上下程品御僕御庶子

直事鼓所者大僕聞鼓聲則速逆此二官當受其事以聞

疏後鄭以達窮是朝士者以朝士職有肺石達窮民窮民先在肺石朝士達之乃得擊鼓故本之也御僕云以序守路鼓云御庶子者蓋以御僕有下士十二人分之為御庶子總名曰御僕也○臨川王氏曰路鼓四面示欲四方無所不達大寢門之外自外至者莫近焉則欲其聞之速也先言窮之則欲其速達甚

於遽令○愚按建鼓之政賈疏以為即肺石窮民朝
士達之乃得擊鼓予謂非也肺石止為獄訟含冤者
設耳故掌之朝士屬之秋官路鼓所達則凡草澤中
抱漆室杞人之慮者咸得上聞或事關機密不可洩
之外朝故特設於路寢門外而掌之大僕屬之司馬
誠重之也不然既謂達窮遽令而復立之肺石使朝
士又得閱其說焉殊非先王萬里堂階之意矣

祭祀賓客喪紀正王之服位詔法儀贊王牲事註詔告

也牲事殺割七載之屬

疏國語云禘郊之事天子必親射牲郊特牲云君肉袒親割敬也易曰震驚百里不喪七鬯少牢不親七下人君故也特牲親七者士卑不嫌也○臨川王氏曰王之牲事以事鬼神苟外不能治其人內不能正其身雖日用牲祭鬼神猶弗饗也大臣衆矣所與治其人莫尊於太宰近臣衆矣所與正其身莫親於太僕故贊牲事以此兩官

王出入則自左馭而前驅註前驅如今道引也道而居左自馭不參乘辟王也亦有車右焉

疏大僕在車左不敢使人馭自馭而前驅也若使人馭馭在中央身無事居左大尊故自馭也知亦有車右者以車右恐車傾覆備非常雖無尊者亦宜有車右勇力者也

凡軍旅田役贊王鼓註王通鼓佐擊其餘面

疏王通鼓者謂王親將軍衆待王擊乃擊之若鼓人

云金鐸通鼓之類也王執路鼓路鼓四面佐擊其餘面也

救日月亦如之註春秋傳曰非日月之書不鼓

大喪始崩戒鼓傳達於四方窆亦如之註戒鼓擊鼓以警衆也鄭司農云窆葬下棺也

縣喪首服之法於宮門註首服之法謂免髻笄總廣狹長短之數縣其書於宮門示四方

疏按小宗伯云縣哀冠之式於路門之外彼云冠專

據男子云衰則兼婦人此云首服明無衰與男子冠
故知惟有免髻笄總也但始死將斬衰者男子笄纚
深衣婦人麻髻并笄總是以喪服斬衰章云女子子
箭笄髻衰三年將齊衰以下者始免男子免婦人布
髻也云廣狹長短者鄭注禮記云免蓋象冠廣一寸
婦人笄齊衰榛木斬衰箭竹為之也

掌三公孤卿之吊勞註王使往也

王燕飲則相其法

疏謂與諸侯燕若公三燕侯伯再燕子男一燕或與羣公燕等皆是其法有主人酌酒獻賓賓酢主人主人酬賓洗爵升降之法○王氏曰燕雖以示慈惠其飲無酌數以醉為度然亦有法故太僕相之也

王射則贊弓矢註贊謂授之受之

王眡燕朝則正位掌擯相註燕朝朝於路寢之庭王圖宗人之嘉事則燕朝

疏以路寢燕安之處故謂燕朝又與賓客饗食在廟

燕在寢也宗人嘉事謂冠婚嘉禮之等○陳氏禮書
曰王燕朝之位雖掌於太僕然其位之所辨不可以
攷文王世子曰公族朝於內朝東面北上臣有貴者
以齒則王之燕朝宜亦然也○愚按陳氏所謂燕朝
以齒者謂王與宗人齒歟

王不眡朝則辭於三公及孤卿註辭謂以王不眡朝之
意告之

愚按太僕之正王位與擯相其法儀何密也夫人欲

之恣未嘗不自起居燕閒萌也萌而無以折之則漸
謂固然而鉅者靡不決而出矣先王之防之也豫而
微微故不勞豫故不覺而正朝廷以正百官以正萬
民無不畢舉而坐享其成是故三代以上左右僕從
雍容談笑而有餘三代已下法家拂士徵色發聲而
不足

小臣掌王之小命詔相王之小瀆儀註小命時事所敕
問也

或曰如尋常傳呼之類

小法儀趨行拱揖之容

掌三公及孤卿之復逆正王之燕服位註謂燕居時也
玉藻曰王卒食玄端而居

王之燕出入則前驅註燕出入者今遊於諸觀苑

大祭祀朝覲沃盥王盥小祭祀賓客饗食賓射掌事如大
僕之法註賓射與諸侯來朝者射

疏祭祀云小則賓客饗食皆蒙小字饗還為小賓客

者也小賓客謂諸侯遣臣聘問天子者也賓射對大射亦為小也

掌士大夫之弔勞

疏亦王所使也

凡大事佐大僕

王先生曰按夏官大僕小臣之於王天宮內小臣內豎之於后其職一也內小臣掌王后之命正其服位出入則前驅而大僕掌正王之服位出入王之大命

王出入則前驅是大僕之職與小臣同內豎云掌內
外之通令凡小事而小臣云掌王之小命是小臣之
職與內豎同然大者掌其大小者掌其小此大僕小
臣之職所以分也至於內小臣之所掌宜若掌后之
小命也乃今日掌王后之命而其通令凡小事則內
豎掌之此以見后之次於王者也況后言命不言大
命后雖有好令於卿大夫曾何大命之有是知大命
皆出於王也周之時后且不預王之大命況於他人

乎後世至陪臣執國命豈可勝歎哉○雜說周公作立政大抵汲汲於用賢而以虎賁綴衣趣馬攜僕列諸左右常伯三事之下夫常伯三事皆大臣名位尊矣視綴衣攜僕至不等而周公一槩言之何也誠以大臣進見有節敷奏有常人君又見其望高德厚待之尊嚴不敢褻近而朝夕與王燕者則斯人也苟有介直之人列於其間潛移默化為力甚易不然則誘之失德亦猶以火銷膏而弗覺者故善論治者必本

人主之身而善正其君者必多引善類與之共處推此則天官一官可以見周公格心事業永嘉陳君舉曰凡饗殮田畧薪蒸醫藥之事及酒漿幄帟次舍甚卑冗煩辱也必用命士領於冢宰若夫宿衛非宮正之羣吏則宮伯之士庶子所謂執戈矛立階祀皆冕衣裳者非若後世但以兵衛也書曰在昔文武侍御僕從罔非正人以旦夕承弼厥辟由此其選也方周公之教世子也魯公之子伯禽衛康叔之子牟齊太

公之子伋俱事成王伯禽年伋蓋宿衛國子也它日
能為顯諸侯而成王與之處則相觀而善之益多其
後詩人刺皇父曰皇父卿士冢伯冢宰仲允膳夫蹶
維趣馬艷妻煽方處以是數人者皆相從於女謁者
也由此觀之王之所與燕私得其人則太子見德而
成王為賢君不得其人則女謁行而褒姒之禍作自
后世子賢否皆係焉而周之興亡從之如之何其可
以不謹乎

祭僕掌受命於王以眡祭祀而警戒祭祀有司糾百官之戒具註謂王有故不親祭也祭祀有司有事於祭祀者糾謂校錄所當共之牲物

劉氏曰王之於祭祀也冢宰正其綱宗伯主其職六官之屬各祗其事先期警戒擇賢執事齋戒滌濯可謂盡其誠敬備乎禮文矣然而具脩之初王不得以躬眡之也乃設祭僕之職專受王命以眡祭祀而警戒有司糾百官之戒具是代王躬眡其事也聖人之

於鬼神盡心如此故以祭則鬼享帝假而受福也

王氏曰祭事甚煩王豈能一一親之特設祭僕六人
專董其事百慮不入其中以致其精明之極所以事
無失禮也

既祭帥羣有司而反命以王命勞之誅其不敬者大喪
復於小廟註小廟高祖以下也始祖曰大廟

凡祭祀王之所不與則賜之禽都家亦如之註玄謂王
所不與同姓有先王之廟

疏畿外同姓諸侯魯衛之屬是也○或曰都家三等
采地春官都宗人家宗人掌其祭祀之類○按明齋
王氏以為諸侯不得祖天子何自有先王之廟蓋謂
同姓有服之親也都家亦如之者謂古帝王及名山
大川之在其地者皆王所當與祭不與則賜之禽耳
唯岐豐舊廟則有之然未詳其祭祀與否

凡祭祀致福者展而受之註臣有祭事必致祭肉於君
所謂歸胙也展謂錄舐其牲體數體數者太牢則以牛

左肩臂臠折九个少牢則以羊左肩七个特牲則以豕左肩五个

疏周人尚右故右胖皆祭以左胖致人祭言太牢天子大夫已上少牢謂天子之士牲皆用前體者前體貴故先用也○王氏曰言展而受之則以胙自外至受而膳王不可以不慎也此又祭僕所以忠於君者如此

御僕掌羣吏之逆及庶民之復與其弔勞註羣吏府吏

以下

王介甫氏曰庶民之復即大司寇所謂遠近惇獨老幼欲有復於上者也故大僕言建路鼓以待達窮者聞鼓聲則速逆御僕也

大祭祀相盥而登註相盥謂奉槃授巾與

劉氏曰小臣掌沃則御僕相盥捧槃授巾也

登為王登牲體於俎特牲饋食禮主人降盥出舉入乃

七載

大喪持翼註翼棺飾也持之者夾蜃車

掌王之燕令註燕居時之令

以序守路鼓註序更

王氏曰御僕下士十有二人以序更守路鼓以待達窮
民與遽令也

隸僕掌五寢之埽除糞洒之事註五寢五廟之寢也周
天子七廟惟祧無寢詩云寢廟翼翼相連貌也前曰廟
後曰寢

疏爾雅釋宮云有東西廂曰廟無曰寢必須寢者祭
在廟薦在寢○長樂陳氏曰先儒謂廟歲神主而祭
以四時寢歲衣冠几杖之具而薦以新物然國語曰
大寒取名魚登水禽嘗之寢廟月令四時新物皆先
薦寢廟蓋有寢者薦於寢無寢者薦於廟非謂薦止
於寢也○嚴陵方氏曰王者之於祖禰以人道事之
則有寢以神道事之則有廟祭神道也薦人道也○
王介甫氏曰王者七廟而曰五寢者蓋二祧將毀先

除其寢去事有漸故也鄭氏謂唯祧無寢是也以文武為二祧則誤矣禮記以遠廟為祧當此時文武最為近廟豈宜稱祧又不設寢乎然則二祧其高祖之父與其祖歟○易氏曰成王之時七廟雖立而未備以天子之禮致大享者五后稷為太祖太王為高祖王季為曾祖文王為祖武王為禰此為五廟五寢

祭祀脩寢註於廟祭寢或有事焉月令凡新物先薦寢

廟

王行洗乘石註鄭司農云乘石王所登以上車之石也
詩云有扁斯石履之卑兮謂上車所登之石

掌蹕官中之事

王氏曰修之所以治壞洗之所以治潔蹕之所以備

警

大喪復於小寢大寢註小寢高祖以下廟之寢也始祖
曰大寢

周禮註疏刪翼卷二十

欽定四庫全書

經部
周禮註疏刪翼卷二十一

詳校官監察御史臣徐如澍

刑部郎中臣許兆椿覆勘

總校官編修臣王燕緒

校對官助教臣胡子襄

謄錄監生臣任兆炯

欽定四庫全書

周禮註疏刪翼卷二十一

明 王志長 撰

弁師掌王之五冕皆玄冕朱裏延紐註冕服有六而言
五冕者大裘之冕蓋無旒不聯數也延冕之覆在上是
以名焉紐小鼻在武上弁所貫也

旒凡冕制周禮無文叔孫通作漢禮器度取灋乎周
今還取彼釋之按彼文凡冕以版廣八寸長尺六寸

上以玄下以朱覆於冠前低一寸 又云爵弁前後
平則得弁稱冕則前低一寸餘得冕名冕則俛也以
低為號也 春秋正義冕俛也後高前下有俛俯之
形蓋以在位者失於驕矜欲令位彌高而志彌下故
制此服令貴者下賤 王氏曰天文南極卑於北極
亦因取象也 陳氏曰司服之服六而弁師之冕五
者大裘衮衣同冕猶后首服同副也 貴與馬氏曰
先儒疑服有六而冕止於五遂謂大裘衮衣二服同

冕然按郊特牲祭之日王被袞以象天玉藻天子龍
卷以祭家語曰郊之日天子大裘以輔之被裘象天
既至泰壇王脫裘矣服袞以臨燔柴設冕璪十有二
旒象天數也陳祥道以為王之祀天內服大裘外被
龍袞龍袞所以襲大裘也然則祭天亦服龍袞特內
襲大裘而宗廟之祭則龍袞內無裘故以大裘而冕
在袞冕之前則大裘袞衣不可分為二服而服與冕
皆五未嘗有六服矣鄭氏又謂大裘之冕無旒是以

大裘為一服無旒者為一冕則有六服亦有六冕然冕之無旒者乃一命之服子男之大夫服之其秩至卑以天子祀天之冕而下同子男之大夫可乎其義不通矣 又按明齋王氏云五冕者謂五服之冕非冕有五也故下文述其制皆同則一冕而已愚謂履人掌服屨之制詳矣豈冕為首服反混焉無別者乎賈公彥云冕名雖同旒數則亦有異誠篤論也總之諸家之論馬氏為覈矣

五采纁十有二就皆五采玉十有二玉筭朱絃註纁雜
文之名也合五采絲為之繩垂於延之前后各十二所
謂邃延也就成也繩之每一匝而貫五采玉十二旒則
十二玉也每就間蓋一寸

疏玉十有二各據一旒而言玉有五色青赤黃白黑
每玉間相去一寸十二玉則十二寸也就成也以一
玉為一成結之使不相并也

朱絃以朱組為絃也絃一條屬兩端於武

陳氏曰禮記天子為籍冕而朱紘諸侯為籍冕而青紘士冠禮緇衣冠青組纓皮弁筭爵弁筭緇組紘纁邊蓋朱者正陽之色天子以為紘青者少陽之色諸侯以為紘緇者陰之色士以為紘卿大夫弁冕之紘無所經見禮器曰管仲鏤簋朱紘君子以為濫鄭氏謂大夫士當緇組紘纁邊理或然也一組繫於左筭遠頤而上屬於右筭垂餘以為飾謂之二紘又曰冕約之以武設之以組貫之以筭固之以紘

纁不言皆有不皆者

疏王之五冕纁則有十二有九有七有五有三其玉旒皆十二故纁不言皆有不皆者則九旒已下是也

玉言皆則五冕旒皆十二玉也 楊氏曰祀天祀先

王皆十二旒祀先公鷩冕則九旒祀四望山川毳冕

則七旒而旒皆十二玉 朱子曰天子鷩冕雖與諸

侯同是九旒但天子九旒十二玉諸侯九旒九玉耳

此為袞衣之冕十二旒則用玉二百八十八鷩衣之冕

纁九旒用玉二百一十六毳衣之冕七旒用玉百六十
八希衣之冕五旒用玉百二十玄衣之冕三旒用玉七
十二

王介甫氏曰五采備采也十有二備數也玉十有二備
物也

諸侯之纁旒九就瑁玉三采其餘如王之事纁旒皆就
玉瑱玉笄註侯當為公字之誤也三采朱白蒼也其餘
謂延組皆玄覆朱裏與王同也纁旒皆就皆三采也每

縑九成則九旒也公之冕用玉百六十二玉瑱塞耳者
按通典黃帝造冕旒始用布帛黃帝作冕垂旒目不
邪觀也充纒耳不聽讒言也 陳氏曰瑱以充耳紃

以垂瑱詩於衛夫人言玉之瑱也於衛武公言充耳
琇瑩於衛之臣子言哀如充耳齊詩言充耳以素以
青以黃尚之以瓊華瓊瑩瓊英則瑱不特施於男子
也婦人亦有之不特施於冕也弁亦有之故詩言充
耳琇瑩繼之以會弁如星喪禮士無冕而瑱用白纒

則弁亦有之可知也士瑱用白纁即詩所謂充耳以素者也人君用黹纁即詩所謂充耳以黃者也毛氏以充耳以素為士之服充耳以青為卿大夫之服充耳以黃為人君之服其說是也其制蓋皆玄統以垂之瓊玉以承之承之詩所謂尚之也檀弓小祥用角瑱楚語曰巴浦之犀犛兕象其可盡乎則古者之瑱亦以象與角為

故書瑁作玩鄭司農云縑當為藻縑古字也藻今字也

玩惡玉名

疏王不見玉瑱於此言之互見也 王氏曰瑨玉三

采則亦德之殺也異乎王之全也荀子曰雖有瑨之
昏昏不若王之昭昭則瑨者石之美而似玉者

王之皮弁會五采玉璣象邸玉笄註故書會作膾鄭司
農云讀如馬會之會謂以五采束髮也士喪禮曰擗用
組乃笄擗讀與膾同書之異耳說曰以組束髮乃著笄
謂之擗沛國人謂反紒為膾會縫中也璣綦通結也皮

弁之縫中每貫結五采玉十二以為飾謂之綦詩云會弁如星又曰其弁伊綦是也邶下柢也以象骨為之

王氏曰皮弁者王眡朝首服象邶以象骨飾弁內頂上之抵 王氏曰玉筭者貫於弁以為固也

王之弁經弁而加環經註弁經王弔所服也其弁如爵弁而素所謂素冠也加環經者大如總之麻經纏而不

糾

諸侯及孤卿大夫之冕韋弁皮弁弁經各以其等為之

而掌其禁令註各以其等纁存玉璣如其命數也冕則
侯伯纁七就用玉九十八子男纁五就用玉五十纁玉
皆三采孤纁四就用玉三十二三命之卿纁三就用玉
十八再命之大夫纁再就用玉八藻玉皆朱綠韋弁皮
弁則侯伯璣飾七子男璣飾五玉亦三采孤則璣飾四
三命之卿璣飾三再命之大夫璣飾二玉亦二采弁經
之弁其辟積如冕纁之就然庶人弔者素委貌一命之
大夫冕而無旒士變冕為爵弁其韋弁皮弁之會無結

飾弁經之弁不辟積禁令者不得相僭踰也玉藻曰君未
有命不敢即乘服不言冠弁冠弁兼於韋弁皮弁矣
不言服弁服弁自天子以下無飾無等

疏爵弁制如冕但無旒為異則無旒之冕亦與爵弁
不殊得謂之冕者冕則前低一寸餘故得冕名前後
平則稱弁也引玉藻文謂諸侯之卿大夫聘於天子
天子賜之冕服歸國告君得君命乃服之未得君命
則為僭踰故引為證也服弁即衰經喪服喪服自天

子達於士共一章也 釋名曰弁如兩手相合拚時

也以爵韋為之謂之爵弁以鹿皮謂皮弁以韎韋謂

韋弁 公羊註皮弁武冠爵弁文冠夏曰收殷曰皐

周曰弁加旒曰冕禮天子朝皮弁夕玄端朝服以聽

朝玄端以燕皮弁以征不義取禽獸行射諸侯朝朝

服夕深衣玄端以燕裨冕以朝天子以祭其祖禩卿

大夫冕服而助君祭朝服祭其祖禩士爵弁黻衣裳

以助公祭玄端以祭其祖禩 王氏曰冕吉服也韋

弁戎服也皮弁朝服也弁經弔服也其為之各有等
明齋王氏曰按舊說冕旒之制所差有四愚據經
文云掌王之五冕皆玄冕朱裏延紐則冕之制同也
五采纁十有二就是五冕之纁其數無不同也又云
皆五采玉十有二是五冕之玉皆一百四十四矣舊
說鷩冕九旒毳冕七旒希冕五旒玄冕三旒非也夫
五服之章有九七五三二之不同而冕則一何也蓋
冕主上覆天之象天一而已人事則不齊故五服異

而五冕同者其亦此意歟此失之一也諸公之纁旒
九就璫玉三采所異者此耳繼之云其餘如王之事
則每旒玉十有二並無九玉之說蓋冠之長尺玉之
間寸十有二玉為尺有二寸故能垂之以蔽目少短
則不足以蔽目矣此正如樂舞之數以其每佾八人
故佾之字從八乃謂每佾人數如其佾數士之四人
豈足以成樂舞乎故侯伯之纁旒七就其餘如公之
事亦每旒玉十有二子男纁旒五就其餘如侯之事

孤纁有四就卿三就大夫再就小國之卿再就其每
旒亦皆十有二唯其采以典瑞之例推之子男而下
當為二采此失之二也夫旒為目而設後之有旒果
何所為故經文敘王之冕止云纁十有二就而不言
二十四諸侯纁存九就而不言十有八若曰止以前
而言則深衣何獨通前後而云十有二幅乎故據經
觀之止有前旒禮記家語並云冕而前旒是亦一證
唯延則有前後玉藻之文可見此失之三也衣止二

章冕止二旒以再命始受服也蓋黼黻相麗去一則
不足以為文二旒相並去一則不足以為蔽故再命
始得受服一命者不服冕惟弁服而已先儒拘於陽
數之說謂玄衣一章玄冕無旒尚足以為冕服乎且
有一章之冕服是一命受服矣此失之四也大抵先
儒之說皆失於不攷經文之過蓋自叔孫通草創漢
制而已然愚直據經文而參以玉藻見後人之說自
不可通欲攷禮者當玩遺經可也

司甲闕

王氏曰書之費誓言敕乃甲冑敕乃干無敢不
弔而後言備乃弓矢鍛乃戈矛礪乃鋒刃無敢不善
蓋甲冑所以自保弓矢與矛所以討敵戎事先自保
而後討敵故周官之序先司甲而後言兵也

司兵掌五兵五盾各辨其物與其等以待軍事註五盾
干櫓之屬其名未盡聞也等謂功沽上下

或曰功良沽惡

鄭司農云五兵戈艾戟首矛夷矛

王氏曰五兵弓矢戈艾矛也 鄧氏曰王曰五兵擊

刺鉤與斬兵二而五也艾所以擊一也刺兵一鋒直

出曰鎗有枝旁出曰戈左右有枝曰戟三隅戟曰戣

二也斬兵長者斧曰戚鉞曰揚三也短兵刀劍四也

勾兵首矛夷矛五也五盾祭朱干以舞一詩龍盾乘

車所建二蒙伐有宛註稱中干貳車所建三旅賁虎

士所執四舍設藩盾五也 劉氏曰辨其物者常利

其器以待用也與其等者常類其聚以待授也 王
氏曰以待軍事除器戒不虞之意

及授兵從司馬之灋以頒之及其授兵輸亦如之及其
用兵亦如之註從司馬之灋令師旅卒兩人數所用多
少也兵輸謂師還有司還兵也用兵謂出給衛守

疏授兵從司馬灋者司馬主六軍是一官之長先受
於王命知多少乃始出軍故從司馬灋以頒之 東
萊呂氏曰古者藏兵於朝大夫家不藏甲凡用兵必

取之廟歸而飲至以見不敢輕舉之意如用命賞於
祖不用命戮於社亦此意如鄭莊公將伐許授兵於
大宮魯公治兵楚武王授師子之類此見春秋之初
其制尚存 雜說甸出革車一乘凡甲戈盾旗物鼓
鐸悉備焉鄉遂之官簡其兵器是也調發則各以其
具行而官府不與知也而司兵司戈盾司弓矢掌授
兵器非授之民也授之卿大夫從軍旅會同者也故
司兵曰及其受兵亦如之是卿大夫畢事則歸之也

若民兵則自藏之民間耳秦人銷鋒鏑欲兵不在民不知揭竿之夫乃能亡秦其與周人藏兵於民之意大異矣 明齋王氏曰凡出軍公卿大夫各有縣都之兵伍兩卒旅則有丘甸之兵惟王之乘車貳車所建之兵與夫親臣所用之兵則於是乎頒焉

祭祀授舞者兵註授以朱干玉戚之屬

大喪廡五兵註玄謂廡興也興作明器之役器五兵也 士喪禮下篇有甲冑干笄

軍事建車之五兵會同亦如之註車之五兵鄭司農所云者是也步卒之五兵則無夷矛而有弓矢

薛氏圖曰夷矛雖不施於步而弓矢未嘗不施於車故兵車射者取左御者處中戎右處右則夫車上固有弓矢也

司戈盾掌戈盾之物而頒之祭祀授旅賁戈故士戈盾授舞者兵亦如之註亦頒之也故士王族故士也與旅賁當事則衛王也戈如杖長尋有四尺

軍旅會同授貳車戈盾建乘車之戈盾授旅賁及虎士
戈盾註乘車王所乘車也軍旅則革路會同則金路
及舍設藩盾行則斂之註舍止也藩盾盾可以藩衛者
如今之扶蘇與

劉氏曰盾有藩盾有車盾有舞盾所施不同則制亦
異矣所以有五者之制

司弓矢掌六弓四弩八矢之灋辨其名物而掌其守藏
與其出入註灋曲直長短之數

疏六弓八矢等各有名號物色出入者頒之受之

中春獻弓弩中秋獻矢箛註弓弩成於和矢箛成於堅箛盛矢器也以獸皮為之

疏按詩云象弭魚箛魚之似獸者為之歟或此獸則魚形也國語云壓弧箕箛則不用獸皮也 王明齋

氏曰橐人職於弓弩矢箛總之以春獻素秋獻成當以之為據此云爾者蓋獻素以弓弩為重獻成以矢箛為全非有二義也必如舊說則弓弩豈不貴堅且

弓矢可相離者乎

及其頒之王弓弧弓以授射甲革楛質者夾弓庾弓以授射矜侯鳥獸者唐弓大弓以授學射者使者勞者註王弧夾庾唐大六者弓異體之名也往體寡來體多曰王弧往體多來體寡曰夾庾往體來體若一曰唐大甲革革甲也春秋傳曰蹲甲而射之質正也樹楛以為射正射甲與楛試弓習武也

王先生曰記曰左射騶虞右射貍首而貫革之射息

傳曰養由基躡甲而射之是所謂甲革也

矰侯五十步及射鳥獸皆近射也近射用弱弓則射大
侯者用王弧射參侯者用唐大矣學射者弓用中後習
彊弱則易也使者勞者弓亦用中遠近可也勞者勤勞
王事若晉文侯文公受王弓矢之賜者

疏晉文侯者謂文侯之命賜之彤弓旅弓是也文公
者謂僖二十八年晉文公敗楚於城濮襄王賜之彤
弓旅弓是也 王氏曰王弧利射甲質以其彊夾庾

利射侯與戈以其弱唐大以授學射者使者勞者以
其得彊弱之中也

其矢箛皆從其弓註從弓數也每弓者一箛百矢

凡弩夾庾利攻守唐大利車戰野戰註攻城壘者與其
自守者相迫近弩弱發疾也車戰野戰進退非彊則不
及弩無王弧王弧恒服弦往體少者使矢不疾

凡矢枉矢絜矢利火射用諸守城車戰殺矢鏃矢用諸
近射田獵矰矢第矢用諸弋射恒矢痺矢用諸散射註

此八矢者弓弩各有四馬枉殺矰恒弓所用也絜鏃第
痺弩所用也枉矢者取名變星飛行有光今之飛矛是
也或謂之兵矢絜矢象馬二者皆可結火以射敵守城
車戰前於重後微輕行疾也殺矢言中則死鏃矢象馬
鏃之言侯也二者皆可以司侯射敵之近者及禽獸前
尤重中深而不可遠也結繳於矢謂之矰矰高也第矢
象馬第之言刺也二者皆可以弋飛鳥刺羅之也前於
重又微輕行不低也恒矢安居之矢也痺矢象馬二者

皆可以散射也。謂禮射及習射也。前後訂其行平也。凡矢之制，枉矢之屬五分，二在前三，在後殺矢之屬三分。一在前，二在後，矧矢之屬七分，三在前三，在後恒矢之屬。軒輶中所謂志也。

天子之弓合九而成規，諸侯合七而成規，大夫合五而成規，士合三而成規。句者謂之弊弓。註往體寡來體多，則合多而圍往體多，來體寡則合少而圍弊猶惡也。句者惡則直者善矣。

疏天子之弓王弧也以其往體寡故合九成規諸侯之弓唐大也以其往來體若一故合七成規大夫之弓夾庾也以其往體多故合五成規士之弓則六弓之外句曲故合三成規 鄭敬仲氏曰剛健者乾之德君之道也至柔者坤之德臣之道也合多而成規者其弓剛合少而成規者其弓柔 按鄭氏弓人注云材良者句少

凡祭祀共射牲之弓矢註射牲示親殺也殺牲非尊者

所親惟射為可國語曰禘郊之事天子必自射其牲
澤共射楛質之弓矢註鄭司農云澤澤宮也射義曰天
子將祭必先射於澤澤者所以擇士也已射於澤而後
射於射宮射中者得與於祭

疏所共弓矢則王弧也上文王弓弧弓以射楛質

按射義疏澤所在無文蓋於寬閒之處近水澤而為
之非惟祭而擇士餘射亦在其中

大射燕射共弓矢如數并夾註如數如當射者之數也

每人一弓乘矢并夾矢籥也

疏四矢曰乘

大喪共明弓矢註明器之用器也士喪禮下篇曰用器
弓矢

疏明器中有用器役器役器中有甲冑干箠用器中
有弓矢

凡師役會同頒弓弩各以其物從授兵甲之儀註物弓
弩矢箠之屬

田弋克籠箠矢共矰矢註籠竹箠也矰矢不在箠者為其相繞亂將用乃共之

王氏曰田弋用矢為多總貯於竹器以為備曰籠分貯於皮器而佩之曰箠克實也

凡亡矢者弗用則更註更償也

王氏曰非射而亡則償之授受會計以此為則也

按郝氏以為既舍再收用若亡矢及收不可用乃請更更易也亦通 明齋王氏曰天之賦畀不齊有人

類必有猛獸毒蟲有中夏必有夷狄有吉人必有凶人奮其爪牙詐力以吞噬虔劉奪攘姦宄於其間使無以自衛及有以勝之則善類不幾於漸滅殆盡耶故見於天象若天鉞所執以威四方伐無道天棂前驅以禦難至於奎宿特為天之武庫所以除戎器戒不虞者至深切矣聖人不忍斯人之沴於不善之類灋秋殺之權以西方之金制為兵器用以驅猛獸兼夷狄伐無道誅不義若攷工記函人廬人之屬皆主

為甲兵者也而其司之者則特屬於夏官以其主九
伐之事尤其所用器也然苟失於防閑則反嬰其害
故雖用兵而常以自衛為主是故司兵者上士而司
甲者則大夫則先為不可勝之意也五兵五盾雖同
掌於司兵而戈主捍敵盾主蔽體特設司戈盾以專
掌之殺敵者以不殺於敵之為尚也弓矢同為兵器
其致用在百步之外故掌之者為下大夫周公之意
以射疏及遠敵不能近之為貴而非以兩軍相薄短

兵接之為尚也觀周公設官之輕重而可以知用兵之方矣

繕人掌王之用弓弩矢箛矰弋挾拾註鄭司農云挾者所以縱弦也拾者所以引弦也詩曰決拾既次詩家說或謂挾謂引弦彊也拾謂鞬扞也玄謂挾挾矢時所以持弦飾也著右手巨指士喪禮曰挾用正玉棘若擇棘則天子用象骨與鞬扞著左臂裏以韋為之

疏此繕人所掌王之用弓弩者謂司弓矢選擇大善

者入繕人以共王用也 或曰挾以骨為之

掌詔王射贊王弓矢之事註告王當射之節及授之受
之

凡乘車充其籠箠載其弓弩

王氏曰乘車王所乘之車充以矢實其中也載載之
於車也

既射則斂之無會計註斂藏之也

疏以王所費損故不會計之

橐人掌受財於職金以齎其工註齎其工者給市財用之直

劉氏曰職金掌凡金玉錫石丹青之戒令受其入征入其金錫於兵器之府及掌士之金罰貨罰入於司兵故受財於職金也 王氏曰弓弩矢箠百工造之在冬官也橐人以所受之財而為之齎以給其市財之直也

弓六物為三等弩四物亦如之註三等者上中下人各

有所宜弓人職曰弓長六尺六寸謂之上制上士服之
長六尺三寸謂之中制中士服之長六尺謂之下制下
士服之弩及矢箛長短之制未聞

矢八物皆三等箛亦如之春獻素秋獻成註矢箛春作
秋成

疏按士喪禮明器有獻素獻成注云形法定為素飾
治畢為成 劉氏曰春素秋成謂弓弩之胎素必備
四時之氣而後成也弓人曰凡弓冬折榦而春液角

夏治筋秋合三材寒莫體體定則成而可獻矣

書其等以饗工註鄭司農云書工巧拙高下之等以制其饗食也玄謂饗酒肴勞之也上工作上等其饗厚下工作下等其饗薄

乘其事試其弓弩以下上其食而誅賞註鄭司農云乘計也計其事之成功也故書試為考玄謂試之而善則上其食尤善又賞之否者反此

乃入功於司弓矢及繕人

王氏曰入功於司弓矢則以待頒也入功於繕人則共王用也

凡齋財與其出入皆在橐人以待會而攷之亡者闕之註皆在橐人者所齋工之財及弓弩矢箠出入其簿書橐人藏之闕猶除也弓弩矢箠棄亡者除之計今見在者

戎右掌戎車之兵革使註使謂王使以兵有所誅斬也春秋傳曰戰於穀晉梁弘御戎萊駒為右戰之明日襄

公縛秦囚使萊駒以戈斬之

疏戎右與君同車在君之右執戈有備非常并充軍
中役使故云掌戎車之兵革使

詔贊王鼓註既告王當鼓之節又助擊之
疏謂助擊其餘面也

傅王命於陳中註為王大言之也

王氏曰以軍衆所在懼其有不聞故也

會同充革車註會同王雖乘金路猶以革路從行也充

之者謂居左也曲禮曰乘君之乘車不敢曠左

疏曲禮注曰君在惡空其位是也 或曰從革車以

備非常也

盟則以玉敦辟盟遂役之註鄭司農云敦器名也辟灋也玄謂將歃血者先執其器為衆陳其載辭使心皆開辟也役之者傳敦血授當歃者

贊牛耳桃茆註鄭司農云贊牛耳春秋傳所謂執牛耳者玄謂尸盟者割牛耳取血助為之及血在敦中以桃

芻拂之又助之也耳者盛以珠盤尸盟者執之桃鬼所畏也芻苕帚所以掃不祥

王氏曰盟之事以不協也戎右以禦侮為職故以玉敦共軟血玉敦者玉府所共戎右則以之而軟血也盟必割牛耳取血相與軟也牛耳以示順聽尸盟者所執而戎右贊之

齊右掌祭祀會同賓客前齊車王秉則持馬行則陪秉註前之者已駕王未秉之時陪秉參秉謂車右也齊右

與齊僕同車而有祭祀之事則兼玉路之右然則戎右
兼田右與

王氏曰王未乘則前馬方乘則持馬既乘而行則陪
乘則齊右之嚴於事王思患預防無或須臾之離矣
與所謂既輸爾載將伯助予者豈可同日語哉

凡有牲事則前馬註王見牲則拱而式居馬前卻行備
驚奔也曲禮曰國君下宗廟式齊牛

道右掌前道車王出入則持馬陪乘如齊車之儀註道

車象路也王行道德之車

王氏介甫曰象路以朝夕燕出入而謂之道車王朝
夕燕出入無非道之故也

自車上諭命於從車

疏按馭夫掌馭貳車從車彼注貳車象路之副從車
戎路田路之副此所諭從車即彼貳車與彼從車別
同名耳 王氏曰王行則以車從王有命焉則道右
宣王之命而諭之也

詔王之車儀註顧式之屬

王氏日記曰不廣欬則口之儀也不妄指則手之儀也立視五雋式視馬尾則目之儀也顧不過轂則首之儀也以至正立執綏不內顧不疾言無非車儀也王式則下前馬王下則以蓋從註以蓋從表尊也

王氏曰王式則下前馬與齊右凡有牲事前馬同意愚按三右職大相同戎右略於儀文主武事也齊右缺於傳命則禮法森嚴之地王其肅穆無言也歟

大馭掌馭玉路以祀及犯軼王自左馭馭下祝登受轡
犯軼遂驅之註行山曰軼犯之者封土為山象以菩芻
棘柏為神主

疏謂於三者之中但用其一以為神主則可也

既祭之以車轆之而去喻無險難也春秋傳曰跋涉山
川詩云載謀載惟取蕭祭脂取羝以軼詩家說曰將出
祖道犯軼之祭也聘禮曰乃舍軼飲酒於其側禮家說
亦謂道祭

某氏曰輶即祭名故詩曰取羝以輶王在車左大馭
執轡居中祭則大馭下車祝神王自左執轡駐馬祝
畢登車受王轡乃驅

及祭酌僕僕左執轡右祭兩軹祭軌乃飲註軹謂兩轄
也軌車前軹也

疏此云及祭酌僕者即上文將犯輶之時當祭左右
轂末及軹酌僕者酌酒與僕僕即大馭也大馭左手
執轡右手祭兩軹並祭軌祭訖乃飲飲者若祭末飲

福乃轆轤而去 王氏介甫曰書曰僕臣正厥后克
正蓋僕正王服位以詔贊擯相前驅為職王有行也
僕為之節王有為也僕為之道故祭祀則贊牲事既
祭則王使馭酌焉明與之並受福也

凡馭路行以肆夏趨以采薺註凡馭路謂五路也肆夏
采薺樂章也行謂大寢至路門趨謂路門至應門

凡馭路儀以鸞和為節註舒疾之法也鸞在衡和在軾
皆以金為鈴

疏按秦詩云輶車鸞鑣毛云鸞在衡鄭云鸞在鑣不從毛義者鄭以田車鸞在鑣乘車鸞在衡此云鸞在衡據乘車而言故也

雜說王氏曰爾雅曰堂上謂之步門外謂之趨蓋行則欲其舒歌肆夏所以節其行趨則欲其齊歌采薺所以節其趨人與車之出入其疾徐皆然樂師則教樂工而歌其詩大馭則馭車而應其節二官所以皆言之也凡馭路儀以鸞和為節者鸞和皆金鈴也鸞在衡和在軾蓋車行則馬動

馬動則鸞鳴鸞鳴則和應大徐則不鳴大疾則不續
此舒疾之法也然則王之行趨固有環珮之聲鏘鳴
於左右車之行趨又有和鸞之聲相應於衡軾所以
養王聰明而非僻之心無自入矣 鄧氏曰通言五
路故以凡該之

戎僕掌馭戎車註戎車革路也師出王乘以自將

王氏曰以韋飾其側及用以為輜輶則矢石不能侵
火攻不能燎故用以即戎

掌王倅車之政正其服註倅副也服謂衆乘戎車者之衣服

犯軼如玉路之儀凡巡守及兵車之會亦如之註如在軍也

掌凡戎車之儀註凡戎車衆之兵車也書序曰武王戎車三百兩

王氏曰戎車之副謂之倅者若衆子之倅其嫡以備卒也有時而佐焉田車之副謂之佐者如衆臣之佐

其君謂之卿佐也常以佐之為事道車之副謂之貳者如世子之貳其父謂之貳儲也有故乃攝而伐之其義各有所主也掌凡戎車之儀戎以威為主甲冑有不可犯之色則戎車之儀可知矣

齊僕掌馭金路以賓朝覲宗遇饗食皆乘金路其灋儀各以其等為車送逆之節註以賓以待賓客節謂王乘車迎賓客及送相去遠近之數上公九十步侯伯七十步子男五十步司儀職曰車逆拜辱又曰及出車送

疏受享於廟則迎之大行人云上公九十步介七人
擯者五人廟中將幣三享鄭注云朝先享不言朝朝
正禮不嫌有等是春夏受贄於朝無迎灋受享則有
之秋冬一受之於廟亦無迎灋故郊特牲云覲禮天
子不下堂而見諸侯是受贄受享皆無迎灋今言朝
覲宗遇饗食皆乘金路者謂因此朝覲宗遇而與諸
侯行饗食在廟即有乘金路迎賓客之灋也

道僕掌馭象路以朝夕燕出入其灋儀如齊車註朝夕

朝朝莫夕

掌貳車之政令註貳亦副

劉氏曰自內外朝乘之以還燕寢故曰朝夕燕出入

王氏曰其灋儀如齊車則朝夕燕出入其度數動容亦各以其等為之節也掌貳車之政令以其有故乃攝而代之故道車之副謂之貳車若典命言適子攝其君則下其君之禮一等是也

田僕掌馭田路以田以鄙註田路木路也田田獵也鄙

循行縣鄙

疏縣鄙在六遂之中王巡六遂縣鄙則六鄉州黨巡之可知舉遠以明近也 王氏曰王行在鄙則去飾故乘木路

掌佐車之政設驅逆之車註佐亦副驅驅禽獸使前趨獲逆衙還之使不出圍

疏少儀注云朝祀之副曰貳戎獵之副曰佐也按王制云大夫殺則止佐車佐車止則百姓田獵

令獲者植旌註以告獲也植樹也

及獻比禽註田弊獲者各獻其禽比種物相從次數之
凡田王提馬而走諸侯晉大夫馳註提猶舉也晉猶抑
也使人扣而舉之抑之皆止奔也馳放不扣

劉氏曰諸侯晉大夫馳所以佐佑翼禽致獲於王也

臨川王氏曰提節之晉進之馳亟進之尊者安舒
卑者速戚 王氏曰大馭掌馭玉路以祀名官曰馭
而戎僕之馭戎路齊僕之馭金路道僕之馭象路田

僕之馭田路皆以馭為職而名官曰僕不曰馭者所以尊玉路也

馭夫掌馭貳車從車使車分公馬而駕治之註貳車象路之副從車戎路田路之副使車驅逆之車

王氏曰自大馭以至田僕皆王五路之馭者也馭夫則馭貳車從車使車而已貳車五路之副貳也從車公卿大夫從王之車也使車聽王役使之車三者皆公車故分公馬而駕治之三等之車既衆故其員亦

六十人 劉氏曰駕治者俾閒習齊一安於五御而去其驚奔也

校人掌王馬之政 註政謂差擇養乘之數也 月令曰班馬政

辨六馬之屬 種馬一物 戎馬一物 齊馬一物 道馬一物 田馬一物 駑馬一物 註種馬謂上善似母者 以次差之 玉路 駕種馬 戎路 駕戎馬 金路 駕齊馬 象路 駕道馬 田路 駕田馬 駑馬 給宮中之役

王氏曰物者謂其毛其足其力皆所謂物也辨其物使之各以類相從故皆曰一物也或曰種馬謂良馬可為種者

凡頒良馬而養乘之乘馬一師四圉三乘為阜阜一趣馬三阜為繫繫一馭夫六繫為廐廐一僕夫六廐成校校有左右駕馬三良馬之數麗馬一圉八麗一師八師一趣馬八趣馬一馭夫註良善也善馬五路之馬鄭司農云四匹為乘養馬為圉故春秋傳曰馬有圉牛有牧

玄謂二耦為乘師趣馬馭夫僕夫帥之名也趣馬下士馭夫中士則僕夫上士也

疏按馭夫中士二十人下士四十人正充此良馬之馭夫 王氏曰圉人良馬匹一人故乘馬四圉圉師教圉人養馬乘馬則一人故乘馬一師也三乘為阜則馬十二匹趣馬阜下士一人故阜一趣馬也三阜為繫繫凡三十六匹繫一馭夫也 王先生曰玉路

之僕曰大馭金路之僕曰齊僕象路之僕曰道僕木

路田僕革路戎僕總而言之皆僕夫也

自乘至廐其數二百一十六匹易乾為馬此應乾之策也至校言成者明六馬各一廐而主馬小備也校有左右則良馬一種四百三十二匹五種合二千一百六十四匹駕馬三之則為千二百九十六匹五良一駕凡三千四百五十六匹然後王馬大備麗耦也駕馬自圍至馭夫凡馬千二十四匹與三良馬之數不相應八皆宜為六字之誤也師十二匹趣馬七十二匹則馭夫四百三

十二匹矣然後從而三之既二之無僕夫者不駕於五路畀之也

王氏曰駕一物而必三良馬之數者以馬材之不良者充役事為多故也 明齋王氏曰舊說謂駕馬一

千二百九十六匹是駕馬為良馬三之一非三良馬之數矣八麗十六匹一圉師教之八師一百二十八匹也一趣馬駕之八趣馬一千二十四匹也一馭夫領之止於馭夫而不屬於僕夫者以駕馬止充雜用

而不當王之五路也凡七馭夫為馬七千一百六十八匹則與三良馬之數略相當矣

天子十有二閑馬六種邦國六閑馬四種家四閑馬二種註降殺之差每廄為一閑諸侯有齊馬道馬田馬大夫有田馬各一閑其駑馬則皆分為三馬

疏天子十二閑分為左右一種馬分為兩廄故一種有四百三十二匹諸侯與大夫直一廄不分為左右則良馬惟有三廄其數六百四十八匹駑馬亦三其

一種其數亦六百四十八匹並為千二百九十六匹
家有二種一良一駑良居一廄二百一十六匹駑馬
三之為六百四十八匹并之為八百六十四匹 林
氏曰成周以民牧者如丘甸歲取馬四匹之類平時
則官給芻秣有警則民供召發然而在天子之都諸
侯之國士大夫之家未嘗不自畜馬蓋此在官養之
爾何以知之如周禮以天子十有二閑先儒論數不
過三千餘匹衛文公承夷狄殘滅之後新造之國未

年亦至駮牝三千若以制度論之衛以諸侯之國又當殘亂之餘安得遽如成周全盛乘馬之數蓋所謂天子十有二閑是養之於官者衛文公之駮牝三千舉官民通數而言之此成周官民通牧之制也阡陌開井田廢兵車不取之田賦戎馬各從官給於是馬政日廢而外患生矣 愚按陳祥道以衛文駮牝三千與齊景千駟同稱以為皆僭侈踰禮之事夫衛文播遷之後能富其國詩人美之讀定之方中之篇至

推其富彊之故本之秉心塞淵絕無有譏其僭踰之意則林氏之說為當而陳氏蓋未之深攷也因攷漢之養馬有五監六廄而武帝之時馬至四十萬唐置八使五十六監麟德間馬至七十萬開元間至四十五萬周天子之馬不過三千四百五十六匹而已蓋漢唐行軍之馬一出於公周制八軍之馬出於民而校人所養者特給公家之用爾此多寡之所以異也今觀鄉遂之官以時辨其馬牛之物登其六畜車輦

則周家之馬政可知而亦可無疑於衛文之騾牝三千矣

凡馬特居四之一註欲其乘之性相似也物同氣則心一鄭司農云四之一者三牝一牡

疏如三牝各產其一通牡為四共駕一車取同氣一心之義 王氏曰三牝一特欲其生之衆也

春祭馬祖執駒註馬祖天駟也孝經說曰房為龍馬

王氏曰房星為天駟馬資之以生春生之時故祭馬

祖

鄭司農云執駒無令近母猶攻駒也二歲曰駒三歲曰
駢玄謂執猶拘也春通淫之時駒弱血氣未定為其乘
匹傷之

夏祭先牧頌馬攻特註先牧始養馬者

疏祭之者夏草茂求肥充也

夏通淫之後攻其特為其蹄齧不可乘用鄭司農云攻
特謂駛之

郝氏曰攻特牝馬方孕攻去其特勿使近牝

秋祭馬社臧僕註馬社始乘馬者世本作曰相土作乘馬鄭司農云臧僕謂簡練馭者令皆善也玄謂僕馭五路之僕

王氏曰馬社廡中之士示也凡馬日中而出日中而入秋馬入廡之時也故祭馬社 郝氏曰社牧地之神秋報成故祭之

冬祭馬步獻馬講馭夫註馬步神為災害馬者獻馬見

成馬於王也馭夫馭貳車從車使車者講猶簡習

王氏曰馬步行神冬大閱故祭馬步 王介甫氏曰

講馭夫者五馭之灋講其藝也 愚按三代用人未

有不先之以教者也馭夫之賤每歲冬必以馭灋進
而教之其進於馭夫者可知矣古人所以能盡其才
而國家亦得士之用蓋自食其教人之報也

凡大祭祀朝覲會同毛馬而頒之註毛馬齊其色也頒
授當乘者

疏按毛詩傳云宗廟齊毫尚純也戎事齊力尚彊也
田獵齊足尚疾也又詩云駟騶彭彭武王所乘又云
四鐵孔阜齊襄公以田是齊色不專據宗廟 王氏

曰詩云此物四騶有馭所謂馭彼乘黃皆齊毫也宗
廟毫而此於朝覲會同亦毛物者承賓如敬神故也
飾幣馬執扑而從之註鄭司農云校人主飾之也幣馬
以馬遺人當幣處者也校人主飾之聘禮曰馬則北面
奠幣於其前士喪禮下篇曰薦馬纓三就入門北面交

轡圍人夾牽之馭者執策立於馬後

凡賓客受其幣馬註賓客之幣馬來朝覲而享王者

大喪飾遣車之馬及葬埋之註言埋之則是馬塗車之
芻靈

田獵則帥驅逆之車註帥猶將也

王氏曰田僕設之校人帥之

凡將事於四海山川則飾黃駒註四海猶四方也王巡
守過大山川則有殺駒以祈沈禮與玉人職有宗祝以

黃金勺前馬之禮

王氏曰馬行地無疆而駒尤捷黃地之色故飾之以

祭

凡國之使者共其幣馬註使者所用私覲

凡軍事物馬而頒之註軍事物馬齊其力也

疏上朝會言毛馬鄭云齊其色此軍事言物馬鄭云
齊其力物即是色而云齊力當與上文互以見義欲
見皆有力有色也 雜說云甸出革車一乘馬四匹

則馬亦民自備也而校人凡軍事物馬而頒之頒官
府卿大夫共軍家者不然校人六廄凡三千四百匹
安得及庶民乎

等馭夫之祿註馭夫於趣馬僕夫為中舉中見上下
宮中之稍食註師圍府史以下也鄭司農云稍食曰廩
王氏曰宮中之稍食則王馬有養成於內者故也

趣馬掌贊正良馬而齊其飲食簡其六節註贊佐也佐
正者謂校人臧僕講馭夫之時簡差也節猶量也差擇

王馬以為六等

疏六等即上種戎齊道田駕六種是也 劉氏曰三
乘為阜而下士一人為之趣馬校人既物而乘之以
為良矣又從而贊正其有弗良也將戒五路謹擇之
至矣齊其飲食欲其力之均也

掌駕說之頒註用馬之次第

疏用馬當均勞逸故駕說須依次第 明齋王氏曰

良馬以駕五路者趣馬所治止於三乘知之為詳故

掌贊而正其等不使間雜不齊六節謂行止進退馳驟之節舊說以為種戎齊道田駕此乃六物豈得為六節且此專指贊正良馬安得以駕馬雜之

辨四時之居治以聽馭夫註居謂牧廄所處治謂執馭攻特之屬

劉氏曰辨四時之居治者二月之後盛陽處外則在牧而有房八月之後陽在地中則廄而有閑也王氏曰以聽馭夫則惟馭夫之所役使也

巫馬掌養疾馬而乘治之相醫而藥攻馬疾受財於校人註乘謂驅步以發其疾知所疾處乃治之相助也

疏巫知馬崇醫知馬疾疾則以藥治之崇則辨而祈之二者相須故巫助醫也云受財者謂共析具及藥直 王氏曰乘治者猶獸醫觀其所發而養之是也相醫而藥者蓋其屬有醫四人其治疾則亦以藥攻馬然醫馬疾大抵以獸醫為主巫馬之用藥亦以相醫而已攻馬疾謂繫而治之蓋其疾有藥不足以療

之者乃用攻馬猶瘍醫所謂以毒藥攻之也

馬死則使其賈粥之入其布於校人註布泉也鄭司農云賈謂其屬官小吏賈二人粥賣也

牧師掌牧地皆有厲禁而頒之註頒馬授圍者所牧處疏厲禁者不得使人輒牧牛馬也 劉氏曰牧地非

一處度其年歲水草之宜與其馬之衆寡而頒之

孟春焚牧註焚牧地以除陳生新草也

中春通淫註中春陰陽交萬物生之時可以合馬之牝

牡也月令季春乃合累牛騰馬遊牝於牧秦時書也秦地寒涼萬物後動

掌其政令凡田事贊焚萊註焚萊者山澤之虞

王氏曰贊之令不得燬其應牧之處也

廋人掌十有二閑之政教以阜馬佚特教駝攻駒及祭馬祖祭閑之先牧及執駒散馬耳圉馬註九者皆有政教焉阜盛壯也詩云四牡孔阜鄭司農云馬三歲曰駝二歲曰駒杜子春云佚當為逸玄謂逸者用之不使過

勞安其血氣也教駢始乘習之也攻駒制其蹄齧者閑之先牧先牧制閑者散馬耳以竹括押其耳頭動搖則括中物後遂串習不復驚

王氏曰圍馬以就牢籠也 祭馬祖執駒見校人職正校人員選註校人謂師圍也正員選者選擇可備員者平之

後儀王氏曰沂渭之間未嘗無牧而非子獨能蕃息於周沂隴之間未嘗無牧而張萬歲獨能蕃息於唐

此得人之效也

郝氏曰校人總馬政擇馬全善者

備五路之用也鄭謂校人為師圉恐非 王氏曰馭

夫而下可以備員於校人而中其選者瘦人差而正

之也 按員選下即云八尺七尺等郝氏之說似長

但員字無著落今並王氏說俱采以備參

馬八尺以上為龍七尺以上為駮六尺以上為馬

王氏曰八尺以上天子以備五路者月令所謂駕蒼

龍也七尺以上諸侯之上駟詩所謂駮牝三千也六

尺以上常馬耳

圉師掌教圉人養馬春除蓐蒙廐始牧夏房馬冬獻馬射則充椹質茨牆則剪闔註蓐馬茲也馬既出而除之新蒙馬神之也

劉氏曰冬寒以草藉馬曰蓐春則除之去其歲也蒙廐辟去邪氣也或曰始牧春草生始出牧也

春秋傳曰凡馬日中而出日中而入玄謂房廡也廡所以庇馬涼也

疏左氏傳莊二十九年春新延廡書不時也延廡當
於秋分時故云凡馬日中而出日中而入謂春秋分
也今之孟春新延廡故云不時 明齋王氏曰教養
馬之事非一而溫涼出入之失時尤其大患故特舉
之 或曰獻馬從校人獻也

充猶居也茨蓋也闔苫也椹質翦闔圍人所習也

劉氏曰椹質盤草以代侯也司弓矢云射甲革椹質
王氏曰次草謂之茨詩云牆有茨苫謂之闔以剉

草為苦則蓋而用之也 某氏曰充供也闔亦蓋也
剪闔翦其亂草 王氏曰圉師房馬習於苦蓋之事
故因而役之

圉人掌養馬芻牧之事以役圉師註役者圉師使令馬
凡賓客喪紀牽馬而入陳註賓客之馬王所以賜之者
詩云雖無予之路車乘馬喪紀之馬啟後所薦馬

或曰啟謂啟殯 劉氏曰賓客陳之於館喪紀陳之
於廟

廠馬亦如之註廠馬遣車之馬人捧之亦牽而入陳
職方氏掌天下之圖以掌天下之地辨其邦國都鄙四
夷八蠻七閩九貉五戎六狄之人民與其財用九穀六
畜之數要周知其利害註天下之圖如今司空輿地圖
也鄭司農云東方曰夷南方曰蠻西方曰戎北方曰貉
狄玄謂閩蠻之別也國語曰閩芊蠻矣四八七九五
六周之所服國數也財用泉穀貨賄也利金錫竹箭之屬
害神姦鑄鼎所象百物也

俊卿章氏曰周天下方千里者九大概與四夷八蠻
七閩九貉五戎六狄并言之其實諸侯封守不如是
之廣以王制攷之西不盡流沙南不盡衡山東不盡
東海北不盡恒山凡四海之內斷長補短方三千里
是天子壤地之實也其間亦有戎狄錯居其中如魯
徐戎之類是也又荆楚之地在江漢之間自楚以南
悉為百越之地而衡山在楚之極南安在天子之封
內耶舉一隅則四方可知矣 東坡蘇氏指掌圖序

昔蘇秦按此以說諸侯而知六國有十倍之勢蕭何藏此以相高祖而知天下阨塞之所在聚米為象馬援以度隗囂建樓以畫德裕以服南詔藩鎮彊梁於河北而險要詳於吉甫先零跋扈於隴西而地形上於充國規制華夷靡不憑此 臨川王氏曰大司徒掌建邦之土地之圖以天下之圖知九州之地域廣輪之數則其掌者特圖而已職方氏掌天下之圖以掌天下之地則其所掌非特圖也又掌其地焉邦國

諸侯之國也都鄙邦國之采地也東方曰夷其種有
四南方曰蠻其種有八東南曰閩其種有七西北曰
貉其種有九西方曰戎其種有五北方曰狄其種有
六自邦國都鄙至於夷蠻閩貉戎狄雖有內外之殊
然先王之政一視而同仁其人民之所聚財用之所
出九穀之所生六畜之所產其數要不可以不辨也
其利害不可以不知也數則列而計之也要則總而
計之也利則凡可以利人者也害則凡可以害人者

也周知其利害則將以興其利而除其害也 雜說

掌天下之地圖而隸於司馬何也謹之也戰國策士
每言窺周室則可以按圖籍爭天下漢大將軍王鳳
亦云太史公書有地形阨塞不宜在諸侯王然則古
人圖志雖司徒營之即藏之司馬祕不得見所以弭
姦而防患也蕭何入秦獨收圖書自漢掌之司空浸
以泄露當時如淮南王皆按輿地圖謀變以此知古
人之慮遠矣 浚儀王氏曰易氏曰大司徒所謂圖

者周知九州地域廣輪之數為建國分封之地職方氏所掌不特九州而已凡中國夷狄畫為九畿皆以圖而籍之故曰掌天下之圖

乃辨九州之國使同貫利註貫事也

劉氏曰辨九州之國使同貫利者四方人民好惡之不同財用有無之不等必周知其利害貫而通之使有無之相易也善惡之相濟也一天下之財用養天下之人民俾同享其利焉其山能出雲雨以生萬物

鎮安於一州者曰鎮水潴而不流以生蒲魚者曰澤
水涸不耕而生草木者曰藪水流而趨海者曰川水
尤深積而成淵者曰浸其民資之以生者曰利其衆
待之以為養者曰畜其土宜之以為食者曰穀八者
九州之民仰之以為生者也九州之邦國仰之以為
富者也苟不周知其數要則天下之民不得而同其
貫利矣得以同貫其利則雖四夷與中國亦得資其
有以濟其乏是以九服安於其土而不失乎養也

潛谿鄧氏曰職方掌天下之地圖辨九州之國司險固為守也宜殫精於險固之守矣乃其職在辨人民男女之所產山鎮澤數川浸之財用與夫九穀六畜之數要任人民府萬物阜財有用使同貫利而已藏用於無形是王道也以其職以所能不强其不及制其貢以所有不强其所無主於生民是王道也 愚按聖王不作則邦國都鄙相戕相賊有蠻夷貉狄之勢聖王在上則不唯四夷享中國聖人之慶而邦國

都鄙未嘗不得四夷貫利之用益稻黍之不能不異
宜也獷悍剽疾之不能不異稟也天地無如之何而
聖人則使之同貿易曰裁成天地之道輔相天地之
宜以左右民中庸所謂天之所覆地之所載日月所
照霜露所墜凡有血氣莫不尊親此之謂矣

東南曰揚州其山鎮曰會稽其澤藪曰具區其川三江
其浸五湖其利金錫竹箭其民二男五女其畜宜鳥獸
其穀宜稻註鎮名山安地德者也會稽在山陰大澤曰

數具區五湖在吳南浸可以為陂灌溉者錫鑠也箭篠也鳥獸孔雀鸞鷓鴣犀象之屬

疏自此以下陳九州之事總為三道陳之先從南方起蓋取尊於陽方周改禹貢以徐梁二州合之於雍青分冀州地以為幽并東南曰揚州次正南曰荊州周之西南不置州統屬雍州即次河南曰豫州為一道也次正東曰青州次河東曰兗州次正西曰雍州為二道又次東北曰幽州次河內曰冀州正北曰并

州為三道 薛氏曰以職方攷之九州山鎮五州五

鎮各正其方當以岳名之所謂五岳充之岱荆之衡
雍之岳并之恒豫之華是也四州四鎮不可以岳名
也直謂之鎮而已所謂四鎮青之沂山幽之醫無閭
冀之霍山揚之會稽是也四鎮五岳總言之皆山鎮
也 王氏曰禹貢惟金三品瑤琨篠簜則金錫竹箭
固揚州所產也 按具區禹貢謂之震澤爾雅注吳
越之間有具區今吳縣南太湖即震澤也三江禹貢

謂婁江東江松江季氏圖則以為大江吳江錢塘為
三江至五湖之說尤不一季氏圖云五湖彭蠡洞庭
巢湖太湖鑑湖或謂即太湖別名周行五百餘里故
名五湖其圖經韋昭義興記種種所載各別從季氏
圖所稱則彭蠡洞庭宜屬荊州具區既見不宜五湖
復列太湖至以周行五百里專指太湖為五湖似尤
非通論

正南曰荊州其山鎮曰衡山其澤藪曰雲夢其川江漢

其浸潁湛其利丹銀齒革其民一男二女其畜宜鳥獸
其穀宜稻註衡山在湘南雲夢在華容潁出陽城宜屬
豫州在此非也湛未聞齒象齒也革犀兕革也杜子春
云湛讀當為人名湛之湛湛或為淮

王氏曰江漢禹貢所謂荊州江漢朝宗於海詩所謂
滔滔江漢南國之紀是已 王氏曰禹貢荊之厥貢
羽毛齒革惟金三品與夫砥礪砮丹則丹銀齒革固
荊州產也 或曰丹朱砂也

河南曰豫州其山鎮曰華山其澤藪曰圃田其川滎雒其浸波澆其利林漆絲枲其民二男三女其畜宜六擾其穀宜五種註華山在華陰圃田在中年滎兗水也出東垣入於河洑為滎滎在滎陽

某氏曰滎與濟水同出王屋東流為濟南渡河溢為滎澤

波讀為播禹貢曰滎播既都春秋傳曰楚子除道梁澆營軍臨隨則澆宜屬荊州在此非也林竹木也六擾馬

牛羊豕犬雞五種黍稷菽麥稻

王氏曰禹貢豫之厥貢漆絲紵紵則林漆絲臬固豫州所產也 某氏曰畜穀獨全者土氣正中也

正東曰青州其山鎮曰沂山其澤數曰望諸其川淮泗其浸沂沭其利蒲魚其民二男二女其畜宜雞狗其穀宜稻麥註沂山沂水所出也在蓋望諸明都也在睢陽沭出東莞

疏望諸即孟諸也爾雅曰宋有益諸按禹貢淮出桐

柏泗水在魯國出濟陰乘氏 集說禹貢海岱及淮
惟徐州又曰淮沂其乂蓋周公以徐為青州故也

按禹貢泗濱浮磬淮夷蠙珠暨魚

河東曰兗州其山鎮曰岱山其澤藪曰大野其川河洿
其浸廬維其利蒲魚其民二男三女其畜宜六擾其穀
宜四種註岱山在博大野在鉅野廬維當為雷雍字之
誤也禹貢曰雷夏既澤雍沮會同雷夏在城陽四種黍
稷稻麥

汾與濟同

正西曰雍州其山鎮曰嶽山其澤藪曰弦蒲其川涇汭
其浸渭洛其利玉石其民三男二女其畜宜牛馬其穀
宜黍稷註嶽吳嶽也及弦蒲在汧涇出涇陽汭在豳地
詩大雅公劉曰汭坻之即洛出懷德鄭司農云弦或為
汧蒲或為蒲

疏按地理志吳山在汧西有弦蒲之藪汧水出焉西
北入渭渭出鳥鼠山也洛出懷德者詩云瞻彼洛矣

是也與禹貢導洛自熊耳者別 或曰禹貢黑水西
河惟雍州涇屬渭汭厥貢球琳琅玕

東北曰幽州其山鎮曰醫無閭其澤數曰獫狁其川河
泑其浸菑時其利魚鹽其民一男三女其畜宜四擾其
穀宜三種註醫無閭在遼東獫狁養在長廣

或曰輿地廣志云今萊陽縣有奚養津

菑出萊蕪時出般陽四擾馬牛羊豕三種黍稷稻

疏幽州之河泑亦與兗同者蓋兗在河東北二州相

連皆有河涉也蓋禹貢又北播為九河同為逆河入
於海導流水東流為濟則幽兗皆河濟所經之地也
河內曰冀州其山鎮曰霍山其澤數曰揚紆其川漳其
浸汾潞其利松柏其民五男三女其畜宜牛羊其穀宜
黍稷註霍山在彘揚紆未聞漳出長子汾出汾陽潞出
歸德

正北曰并州其山鎮曰恒山其澤數曰昭餘祁其川虜
池嘔夷其浸涑易其利布帛其民二男三女其畜宜五

擾其穀宜五種註恒山在上曲陽昭餘祁在鄆庫池出
鹵城嘔夷祁夷與出平舒涑出廣昌易出故安五擾馬
牛羊犬豕五種黍稷麥菽稻也此州界揚荆豫兗雍冀
與禹貢略同青州則徐州地幽并則青冀之北也無徐
梁凡九州及山鎮澤數言曰者以其非一曰其大者耳
薛氏曰凡九州之土高者宜黍稷下者宜稻麥山氣
多男澤氣多女東南多絲纊西北多織皮先王之於
民因其東西南北之異方山澤川浸之異宜男女異

數玉石異產黍稷稻粱之異種丹漆絲枲之異利廣
谷異制民生異俗為之修其教而不易其俗齊其政
而不易其宜山者不使居川澤者不使居中原驛剛
之地糞種不以羊赤緹之地糞種不以牛然後五方
之民各安其性樂其業而無偏弊之患矣 明齋王
氏曰愚按九州分立與虞書禹貢異者蓋禹主於治
水幽并營皆北方廣莫之地罹水患少故幽并統於
冀營統於青而止九州舜時四夷來王封域極廣肇

十有二州後有作者不可及矣周時大約與舜同但
淮與大野在禹貢為徐州之川澤而職方青州之川
淮泗兗州之澤大野是以徐而入青兗矣華陽璆鐵
磬磬在禹貢為梁州之山與貢也而職方豫州之山
華雍州之利玉石是以梁而入雍豫矣此為不同耳
然無徐州者蓋洪水之害唯河為大禹於其下流施
功為多故建徐州周時碣石淪於海正東之地不及
於虞故有青兗則雖革徐州而東方為無空若無梁

州則西南輿地似於缺然何也夫天地之化開之有漸始西北而次東北次東南次正南故上古聖人皆出於北方周家世居西土文王之化延及江漢正荆州之地武王伐紂而庸蜀羌髳景從是乃梁州以及於徼外之地然其中未歸化者則甚衆故周公以其施貢所及者則分屬於荆雍豫而其不及以政者亦不入於職方也方今財賦文獻多出南方雖閩越南粵自古所謂夷狄者今悉與中土無異獨西南之地

但為來王之國而時背叛者宜周公於此不置州屬也夫聖人之教不先天以開人亦不棄天以從人西南之域開之有時是故不能彊之以俟後聖也乃若北方營州醫無閭冀州河套之內等地正職方氏所謂穀宜三種畜宜四擾而在九服之內其外則為九貉六狄亦皆內屬而周知其民物之數者自周德之衰而為北漠之所竊據秦人不知守在四夷之道為長城以限之遂使肥美之地與兗豫等者悉淪於沙

漠不毛之域自漢以來欲為控禦之策者已為大事而不思生聚教訓以經畧吾之九服乃分內事是不免於棄天也

乃辨九服之邦國方千里曰王畿其外方五百里曰侯服又其外方五百里曰甸服又其外方五百里曰男服又其外方五百里曰采服又其外方五百里曰衛服又其外方五百里曰蠻服又其外方五百里曰夷服又其外方五百里曰鎮服又其外方五百里曰藩服註服服

事天子也詩云侯于周服

周語祭公謀父曰先王之制邦內甸服邦外侯服侯
衛賓服蠻夷要服戎翟荒服甸服者祭侯服者祀賓
服者享要服者貢荒服者王日祭月祀時享歲貢終
王襄王曰先王規方千里以為甸服其餘以均分公
侯伯子男使各有寧宇 丘氏曰周制九服而周官
唯曰六服羣辟罔不承德又曰五服一朝者蓋衛服
之外雖制之服而不必其來故武城敘諸侯之助祭

康誥稱諸侯之和會康王之誥陳諸侯之聽命止言
五服而已 後儀王氏曰王制凡九州千七百七十
三國天子之元士諸侯之附庸不與注禹會諸侯於
塗山執玉帛者萬國唯謂中國耳禹承堯舜而然要
服之內地方七十里乃能容之夏衰夷狄內侵諸侯
相并地減國少殷湯承之更制中國方三千里之界
分為九州而建千七百七十三國周公復唐虞之舊
域分其五服為九其要服之內亦方七千里而因殷

諸侯之數廣其土增其爵孝經說曰周千八百諸侯布列五千里內正義謂治水之後舊域許謹以漢地攷之自黑水至東海衡山之陽至朔方經略萬里

又曰周官六服羣辟注周禮九服此惟言六者夷鎮蕃在九州之外王者於夷狄羈縻而已不可同華夏六服惟言侯甸者二服去圻最近六年五服一朝周禮無此法孔以五服為侯甸男采衛蓋以要服遠不能常及期故不數又曰晉志帝堯時禹平水土為

九州虞舜登庸表提類而分區宇判山河而考疆域
冀北創并部之名燕齊起幽營之號書所謂肇十有
二州封十有二山也周成王時改作禹貢徐梁入於
青雍冀野析於幽并職方均天下之土以周厥利保
章辨九州之野皆有分星東南曰揚正南曰荆河南
曰豫正東曰清河東曰兗正西曰雍東北曰幽河內
曰冀正北曰并 蔡氏曰今按每服五百里五服則
二千五百里南北東西相距五千里故益稷篇言弼

成五服至於五千然堯都冀州冀之北境并雲中涿
易亦恐無二千五百里藉使有之亦皆沙漠不毛之
地而東南財賦所出則反棄於要荒以地勢攷之殊
未可曉但意古今地土盛衰不同當舜之時冀北之
地未必荒落如後世耳亦猶閩浙之間舊為蠻夷淵
藪而今富庶繁衍遂為上國土地興廢不可以一時
概也周制九畿曰侯甸男采衛蠻夷鎮蕃每畿亦五
百里而王畿又不在其中并之則一方五千里四方

相距為萬里蓋倍禹服之數也漢地志亦言東西九千里南北一萬三千里先儒皆疑禹服之狹而周漢地廣或以周服里數皆以方言或以古今尺有長短或以為禹直方計而後世以人迹屈曲取之要之皆非的論蓋禹聲教所及則地盡四海而其疆理則止以五服為制至荒服之外又別為區畫如所謂咸建五長是已周漢則盡其地之所至而疆畫之也 漁仲鄭氏曰禹貢有五服各服五百里是禹之時地方

五千里職方有九服亦各五百里并王畿千里則周之時地方萬里矣五服九服之制雖若不同詳攷制度無不相合禹之五服各五百里自其一面而數之職方九服各五百里自其兩面而數之也周之王畿即禹之甸服各方千里禹貢之甸服五百里據一面而數之周畿千里不在九服之內王畿之外定制為九服各五百里以兩面相方而數之大抵周之王畿即禹之甸服周之侯甸即禹之侯服周之男采即禹

之綏服周之衛蠻即禹之要服周之鎮夷即禹之荒服大率二畿當一服而周人鎮服之外又有五百里之藩服去王城二千五百里乃九州之外地增於禹貢五百里而已故行人之職其言九州之外謂之藩服則九州之外又有五百里之藩服明矣且禹貢五服而止周人必加以藩服五百里何也求之禹貢亦莫不然禹貢既敘五服又曰東漸於海西被於流沙朔南暨聲教訖於四海是九州之外地也又如益稷

曰弼成五服至於五千州十有二師外薄四海咸建
五長謂四海之外各建諸侯為之長豈非周之藩服
乎詳攷制度無不相合求之里數未始不同先儒有
禹加弼萬里周斥大封疆之說後人又為圖以實之
皆攷古未精耳然尚書之周官周禮之行人又有六
服承弼六服一朝之文何也蓋王巡守及於六服六
服之外夷服鎮服即禹之荒服言六服則不及夷鎮
言九州之內則不及藩鎮明矣如此不特見二畿當

一服藩服當四海之外今制而為圖則周之王畿有鄉遂稍縣都即禹之甸服納總秸銍粟米之地周之侯服即禹采男之地周之男服即禹揆文教之地周之采服即禹奮武衛之地周之衛服即禹三百里夷之地周之要服即禹二百里蔡之地周之夷服即禹三百里蠻之地周之鎮服即禹二百里流之地周之藩服即禹九州之外地

凡邦國千里封公以方五百里則四公方四百里則六

侯方三百里則七伯方二百里則二十五子方百里則百男以周知天下註一州之中以其千里封公則可四又以其千里封侯則可六又以其千里封伯則可十一云七伯者字之誤也又以其千里封子則可二十五又以其千里封男則可百

王先生曰按禮記疏云職方氏方千里封公以方五百則四公注云每事言則者殺也是不實封必知不實封者以每州有四公八州則三十二公周之上公

惟杞宋耳故知非實封也 朱子語錄曰向來君舉

進制度說周禮封疆方五百里是周圍五百里徑只
百二十五里方四百里者徑只百里方三百里徑只
七十五里方二百里徑只五十里方百里者徑只二
十五里自竒其說與王制等語相合然本文方千里
之地以封公則四公以封侯則六侯以封伯則七伯
以封子則二十五子以封男則百男其地已有定數
此說如何可通况男國二十五里之小則國君即今

之一者長耳何以為國君 薛氏圖云邦國有正封
之地有廣封之地公侯方百里伯七十里子男五十
里此正封也諸侯之地封疆方五百里侯四百里伯
三百里子二百里男百里此廣封也職方兼附庸之
地而言之廣封者也然以邦國千里計之方四百里
則六侯餘四百里方三百里則十一伯餘百里何也
蓋地勢不能常如棊局之方特因侯伯之爵以里數
封之而已餘里無所餘焉職方氏舉其大數然也周

制天下之地凡五千五百里一千為王畿一千五百里為夷鎮藩之服封諸侯之地則三千里而已今此封公侯伯子男地各千里合而數之則六千里何也蓋職方氏特言封疆之數非有地里如此廣也鄭氏謂九州之界方七千里七七四十九凡千里者四十九其一為畿內餘四十八州各有方千里者六以封公侯伯子男之地誤矣

凡邦國小大相維註大國比小國小國事大國各有屬

相維聯也

疏王制云五國以為屬屬有長十國以為連連有帥三十國以為卒卒有正二百一十國以為州州有伯彼雖是殷之諸侯亦各有屬相維聯故鄭據而言也王設其牧註選諸侯之賢者為牧使牧理之

王氏曰九州之牧也

制其職各以其所能註牧監參伍之屬用能所任秩次制其貢各以其所有註國之地物所有

雜說三代牧守更代諸侯世襲權皆出於上如周初
時荊州牧蔡叔其後則申侯豫州牧管叔其後則虢
公周公君陳畢公迭居東郊宣王中興但理會牧伯
而已故韓侯在韓召虎在淮申伯在荆方叔在齊漢
諸侯王自景武後若寄君然已不足言至唐藩鎮則
是舉五侯九伯汝實征之之事而付之世襲之人其
弊有不可勝言者矣

王將巡守則戒於四方曰各修平乃守攷乃職事無敢

不敬戒國有大刑註乃猶女也守謂國竟之內職事所當共具

王氏曰王巡守則諸侯各朝於方嶽之下故戒於四方也修平乃守則諸侯所守之土也攷乃職事則諸侯所治之職也故曰天子適諸侯曰巡守巡守者巡所守也諸侯朝於天子曰述職述職者述所職也

及王之所行先道帥其屬而巡戒令註先道先由王所從道居前行其前日所戒之令

王氏曰乃守若土地辟田野治之類將至而先戒之使之豫備既至而前巡之攷其不法

王殷國亦如之註殷猶衆也十二歲王若不巡守則六服盡朝謂之殷國其戒四方諸侯與巡守同

疏王有故不巡守於方岳之下則春東方盡來夏南方盡來秋西方盡來冬北方盡來王待之亦各於其時在國外為壇行朝覲盟載之法殷國所在無常或在畿內國城外或向畿外諸侯之國行之故有戒令

之事 集說陳氏博議自古封建之法天下至廣難以統一故五載一巡守以一風俗以通民情至周而五載一巡守既不能行故置職方氏揮人訓方氏之官以通達上下使無壅蔽逮漢或遣謁者循行天下是亦得周公之遺意也自元封五年初置刺史每以秋分行部以詔書六條察郡國舉不法而後天下民情利害其壅遏通達皆係於刺史之手而上或不得以聞之宣元以後稍還古意天子則有郎官之出宰

相則有掾吏之行上下相察莫之或匿如元帝詔條
責于定國曰郎有從東方來者言民父子相棄丞相
御史案事之吏匿而不言耶將從東方來加增之耶
何以錯謬至是定國惶恐自劾是丞相隱之天子而
不知郎吏已得上聞如魏相救掾吏案事郡國輒
白四方異聞或有逆賊風雨災異郡不上達相輒奏
言之是郡國欲隱之宰相而不知掾吏已得上達
民情既通上下不壅則治可為也

土方氏掌土圭之灋以致日景註致日景者夏至景尺有五寸冬至景丈三尺其間則日有長短

以土地相宅而建邦國都鄙註土地猶度地知東西南北之深而相其可居者宅居也

以辨土宜土化之灋而授任地者註土宜謂九穀植穉所宜也土化地之輕重糞種所宜用也任地者載師之屬

王巡守則樹王宮註為之藩羅

某氏曰佐掌舍為之 王氏曰大司徒掌建邦國及
土宜之法土方氏皆輔相之但司徒草人所掌止於
王畿而土方氏所掌則及於四方故名官以土方氏
馬

懷方氏掌來遠方之民致方貢致遠物而送逆之達之
以節註遠方之民四夷之民也諭德延譽以來之
疏曉諭以王之德美又延引以王之美譽以招來之
遠物九州之外無貢灋而至者

疏致方貢謂六服諸侯又云致遠物宜是蕃國 劉
氏曰遠人不服則修文德以來之是懷萬方以成蓼
蕭之化者聖王之事也遠人既來則懷方氏掌其送
逆道路之給而開之以道德仁義之化悅之以聖人
中和禮樂之方陳之以位天地和陰陽之本感之以
致神祇遂生育之義使之心懷而誠服踴躍於內向
而不知其已者也 明齋王氏曰方貢若六服之外
蕃國猶在貢獻之數者遠物若越裳肅慎其國尤遠

不在貢獻之數故曰遠物也

達民以旌節達貢以璽節

治其委積館舍飲食註續食其往來

王氏曰治其委積所以備其用治其館舍所以安其
居治其飲食所以順其嗜好 王氏曰四夷之來各
有其方諸侯若非其人應之不得其道其為中國之
累大矣來則逆之去則送之以為禮也達之以節使
行無稽滯治其委積館舍飲食使之居處安而食用

足所謂來之之道如此蓋非求其來但有以待之示無外之意耳

合方氏掌達天下之道路註津梁相湊不得陷絕通其財利註茂遷其有無

同其數器註權衡不得有輕重

壹其度量註丈尺釜鍾不得有大小

按摯虞傳陳總掘地得古尺尚書奏今尺長於古尺宜以古為正潘岳以為不宜改虞駁曰今尺長於古

尺幾於半寸樂府用之律呂不合史官用之歷象失
占醫局用之孔穴乖錯宜如所奏

除其怨惡註怨惡邦國相侵虐

同其好善註所好所善謂風俗所高尚

雜說同其好善所以一道德而同風俗 愚按除其
怨惡同其好善所謂同其好惡是也

訓方氏掌道四方之政事與其上下之志註道猶言也
為王說之四方諸侯也上下君臣也

誦四方之傳道註傳道世世所傳說往古之事也為王
誦之若今論聖德堯舜之道矣

正歲則布而訓四方註布告以教天下使世知所善惡
而觀新物註四時於新物出則觀之以知民志所好惡
志淫行僻則當以政教化正之

疏若王制云命市納賈以知民之所好惡志淫行僻
則當以政教化正之與此為類故鄭云以繹經也

雜說先知覺後知先覺覺後覺則易昏為明易惡為

善變化氣質如螟蛉之肖螺贏新物如舊染汚俗咸
與維新也 王氏曰夫訓方氏道四方之政事與上

下之志誦其傳道則有以資王見聞而王之所聞益
聰所見益明矣正歲則布而訓四方正歲一歲之始
也既誦以所道又訓以所誦察其志好而訓焉如是
則四方之遠所聞無非正言所見無非正行而道德
由之一風俗由之同矣夫先王所以致天下之大順
而自由國為一人者吾何容心哉置官設屬使取四

方之善以同之而已

形方氏掌制邦國之地域而正其封疆無有華離之地
使小國事大國大國比小國註杜子春云離當為雜玄
謂華讀為佻哨之佻正之使不佻邪離絕

疏形方氏主知四方土地形勢故使掌作邦國之地
域大小形勢又當正其封疆勿使相侵地有佻邪離
絕通相侵人則不正故今正之佻者兩頭寬中狹邪
者謂一頭寬一頭狹云佻哨之佻者投壺禮主人云

枉矢哨壺是不正之義故讀從之 臨川王氏曰析而不絕為華絕而不屬為離正其封疆使無有華離之地則小國易以守大國難以侵人各有其土宇而無交爭之患矣 王氏曰大司徒凡建邦國以土圭土其地而制其域自諸公至子男其封疆各有多寡之數形方氏之職掌制邦國之地域而正其封疆凡以成大司徒之事而已 劉氏曰大司馬建邦國之九法有均守平則以安邦國之法則形方氏正其封

疆不使相侵而無有華離是也有比小事大以和邦
國之法則形方氏小國事大國大國比小國是也大
國不比於小國則侵其封疆而有華離矣正之弗從
然後詔於大司馬而九伐行焉聖人於征伐必有其
漸不得已而後行也 愚按註疏釋華離義似太鑿
王明齋云華者分析如華辯也正與介甫析而不絕
解合然形如華辯則易侵而勢若犬牙則難動又何
也意威福之柄所以親諸侯者固別有所操與

山師掌山林之名辨其物與其利害而頒之於邦國使致其珍異之物註山林之名與物若岱畎絲枲嶧陽孤桐矣利其中人用者害毒物及螫噬之蟲獸

疏此山師及下川師原師等皆是遙掌畿外邦國之內山川原隰之等使出稅珍異以供王家也禹貢青州云岱畎絲枲畎谷也岱山之谷有之徐州云嶧陽孤桐孤特也嶧山之陽特生之桐中為琴瑟 劉氏曰頒其名數於邦國致之於王以供膳羞服用也既

曰珍異之物則非貢賦所及矣

川師掌川澤之名辨其物與其利害而頒之於邦國使致其珍異之物註川澤之名與物若泗濱浮磬淮夷蠙珠暨魚澤之萑蒲

疏泗水之石可以為磬蠙珠珠名 明齋王氏曰旅

葬之訓曰不貴異物民乃足不寶遠物則遠人格而此言致其珍異者蓋物性不同自有非常之物可以療疾致用適欲用之不可必得故有則致之非以之

供玩好而為常貢也

逢師掌四方之地名辨其丘陵墳衍逢隰之名註地名
謂東原大陸之屬

疏高平曰原此雖以原為主除山林川澤四者餘丘
陵墳衍原隰皆主之禹貢東原底平大陸既作介
甫王氏曰辨其名以知平陂燥濕辨其物以知肥磽
嫩惡

物之可以封邑者註物之謂相其土地可以居民立邑

王氏曰大司徒辨山林川澤丘陵墳衍原隰之名而辨其邦國都邑之數而溝封之而原師所掌如此亦以輔成司徒之事而已 王氏曰五地名物與土宜土化大司徒掌之此復掌之者制畿封國施貢分職簡稽鄉民皆司馬之事故職方諸屬掌之特詳 某氏曰此大司馬正邦國土地之政

匡人掌達灋則匡邦國而觀其慝使無敢反側以聽王命註灋則八灋八則也邦國之官府都鄙亦用焉慝姦

偽之惡也反側猶背違瀆度也書曰無反無側王道正直

劉氏曰如是則諸侯之犯令陵政者暴內陵外者不陷於九伐矣

擲人掌誦王志道國之政事以巡天下之邦國而語之註道猶言也以王之志與政事諭說諸侯使不迷惑

使萬民和說而正王面註面猶鄉也使民之心曉而正

鄉王

都司馬掌都之士庶子及其衆庶車馬兵甲之戒令註
庶子卿大夫士之子車馬兵甲備軍發卒

疏都王子弟所封及三公采地也司馬主其軍賦故
云掌都之士庶子宫伯註云士適子庶子其支庶此
都之士庶子亦然王家有軍事徵兵於采地都鄙則
都司馬以書致於士庶子有此衆庶車馬兵甲之戒
令士庶子受而行之 王氏曰衆庶凡在都之人民
以國濩掌其政學註政謂賦稅也學修德學道

以聽國司馬註聽者受行其所徵為也國司馬大司馬之屬皆是

劉氏曰夫采地之卿大夫仕於王朝士庶子在外既不屬於宮伯大司樂則以國教胄子之法教之於其都之學及有軍旅之事徵兵於都鄙則以士庶子作其衆庶車馬兵甲而都司馬掌其戒令以聽於國大司馬奉其節制以進退攻討焉

家司馬亦如之註大夫家臣為司馬者春秋傳曰叔孫

氏之司馬駿戾曰我家臣也不敢知國


疏按序官云家司馬各使其臣以正於公司馬鄭氏曰家卿大夫采地正猶聽也公司馬國司馬也卿大夫之采地王不特置司馬各使其家臣為司馬主其地之軍賦往聽政於王之司馬王之司馬其以王命來有事則曰國司馬 王氏曰都司馬掌大都小都之士庶子者也家司馬掌家邑亦如都司馬之事

陳氏集說云都家皆畿內采地既有其地又有其民

又有其賄非王朝制其兵柄則將抗衡於上矣春秋
楚子與若敖氏戰於澨與晉之六卿魯之三家宋之
華氏其調發禁令悉自主之而國家弗敢問安得不
與上競乎 丘氏曰古者國之子弟無時不知教無
處不有學退在學校受教於司樂進在王朝受教於
司保氏入而宿衛有宮伯按其在版者而教之出而
守禦有都司馬掌其正學以教之出入進退教未嘗
不行其間非若後世之教止於庠序而已 明齋王

氏曰都之士庶子謂孟仲兩卿而下五大夫衆士之
適子庶子也衆庶應起徒役之人也車馬兵甲備車
發卒也都司馬平時糾戒之無有違慢率令之使之
興事則都家之君雖有數百乘之富而無不屬之王
朝者矣然此但治其軍賦之事而已政若諸子之所
掌學謂司士大司樂之所教都司馬教治其都之士
庶子一如王國教胄子之法然後世祿之人無驕淫
敗禮者矣及有軍旅之事徵兵於都鄙則都司馬率

之以聽於大司馬故朝大夫云治有不及在軍旅則
誅其有司也此周公馭都家之法所以都鄙之君無
抗衡之患也歟



周禮註疏刪翼卷二十一